

تواييت العشق

محمد ديغم



مجموعة قصصية

تواييت العشق

محمد ديغم

مجموعة قصصية

اسم الكتاب: توابيت العشق
اسم المؤلف: محمد ديغم
مصمم الغلاف : حازم مصطفى

الناشر: البوكر للنشر الإلكتروني
مدير النشر : محمد إيهاب
مدير عام الدار : أحمد سمير
جميع الحقوق محفوظة للمؤلف.

ولا يجوز اقتصاص أي جزء من هذا الكتاب بهدف
إهدار حقوق الملكية الفكرية أو إعادة إنتاجه بشكل مادي
أو معنوي.

جميع الحقوق محفوظة © البوكر للنشر الإلكتروني

www.elbookar.com

البوكر
كتابك موجود

التابوت الأول

القصاص

كتب لها " لم تكونى الأجل ورأيتك الأجل .. لم تكونى
الأفضل ووهمت نفسى بأنك الأفضل .. فقط كنت كبيت
جميل من الخارج .. مهجور من الداخل
ليتنى لم أرك .. ليتنى أستطيع كبح جماح قلبى عن حبك ..
قلبى الذى سكنتيه بإرادتى .. وهجرتيه بإرادتك .. بدون
إنذار مسبق .. ليتنى كنت أعلم ..
أو حتى إذا كنت أعلم لم أكن لأصدق يوماً أنك
ستتركينى ..

قولى لى أنك لم تفعلى وسأصدقك .. قولى لى بأنها
ظروف خارجه عن إرادتك وسأسامحك .. فقط قولى
بأنك أحببتينى بحق .. إكذبنى وسأصدقك فهكذا كان الحال
دائماً ..

ولكن قولى بصدق .. لماذا فعلت ذلك بى ؟ .. ألم أكن
دوماً حنوناً ؟! .. ألم أكن دوماً عاشقاً من الطراز الأول

!؟ لماذا فعلت ذلك بي؟" ...

كتبها فى مستطيل.. يوجد به كلمه "send" ..

كتبها وقرأها ... ثم تردد طويلاً .. حتى مسحها وأغلق
اللاب توب ووضعها بجانبه على السرير .. فقط أخرج
من جيبه دبله من الذهب .. أخذ يتأملها كثيراً ويقلبها
بيديه .. وكأنه يسألها .. يا ترى أين الآن الأصابع التى
كانت ترتديكِ ؟

أحكم قبضته عليها .. ووضعها بجيبه ..

نهض متجهاً نحو الشرفه .. يتأمل تلك السماء

.. عجباً .. أين كانت تُخفى كل ذلك المطر ..

مد يده من الشرفه ليتحسس ذلك الماء البارد .. أغمض

عيناه .. وسبح فى ذكرياته .. ليضفى عليه عقله ذلك

اليوم البارد .. ذلك التاريخ الذى يتذكره مثل اسمه ..

٢٠٠٩/١/٧ .. كان يوم ممطر بارد .. كان يختبئ تحت

قميصه يعطوه چاكييت جلدى بنى اللون .. حاوطت رقبتة

كوفيه كاروهات ، إختبأت أطرافها تحت الجاكييت .. كان

شعره مبتلاً تماماً مثل نظارته الكلاسيكيه .. كان زجاج

النظاره المبتل يحجب الرؤيه قليلاً .. فكان ينزعها كل

دقيقتين ينظفها ويرتديها ..
وما إن إرتداها حتى وكأنه لم يفعل شئ..
دخل مدخل العماره التى يسكن بها مسرعاً ...وبنفس
السرعه دخل الأسانسير..
خلع نظارته مجدداً لينظفها.. ثم يرتديها ليجدها بجواره
.. تلك الفتاه بيضاء اللون .. ذو الشعر المموج
الأسمر..تضغط ذلك الزر الذى أمر الأسانسير بالصعود
إلى الدور العاشر...
لم ينظر لها كثيراً.. بل كانت صورتها المنعكسه على
مراه الأسانسير تجذبه ..
لا يتذكر أنه رأى فتاه أجمل منها .. راوده خياله
الرومانسى بأن يجذبها فى حوار ما مُفتكس... لكن
طبيعته الخجوله حالت بين ذلك..حتى تضيق الفرصه
بإنفتاح باب الأسانسير وخرجها منه .
..ظل يراقبها .. لم يرى تلك الإمكانيات الجباره ..فهو
من نوع الرجال الذين يبحثون عن المضمون أكثر من
العنوان ..
يبحثون عن الحب العفيف الذى لا يتخيل فيه حبيبته فى
وضع جنسى ما ..

ظناً منه أن الحب الصادق لا بد أن يكون رهينه
للطرفين..وأما بعد الزواج فتكون زياره الفراش على
إستحياء..لا يعلم أنه عندما يزور عاشقان فراش ما
..يتبادلان الحب فى كافه صوره ..

الحب الكامل غير المنقوص..
يزوران الفراش بروحهما ..لتتألق أجسادهما بين النور
الخافت..

فإشباع الجسد أمر سهل للغاية ..لكن إشباع الروح ،
شئ ما ذو إستيراتيجه مٌعقده ..ديناميكيه مُتأستكه ..عالم
آخر ذو قواعد خاصه..

لم يكن يعلم شيئاً عن هذا العالم ..هكذا هو ..وهكذا رآها
قبل أن تختفى عن أنظاره ..وقبل أن يضغط ذلك الزر
الذى هبط به إلى الدور الثامن ..
...كان هذا اللقاء الأول...

عاد وألقى بجسده على السرير وأمسك اللاب توب ..فتح
"الأكونت" الخاص بها..فقط يراقب إن كانت كتبت شيئاً
جديداً على صفحتها .. ظل يتأمل الصفحه..لا
جديد..زادت دقائق الإنتظار وزاد معها عدد المرات
التي يفعل بها "refresh"...

حتى غلبه النوم..

* * *

استيقظت كعادتها ..يشعرها المنكوش .. تمسك
بالموبايل تنظر إليه...وتضعه مكانه .. لا تتذكر كم
كانت الساعه !.. ولا تعرف لماذا لا تقلع عن هذه العاده
اليوميه ، تلك العادات التي نفعها ولا نجد سبباً ما مقنع
لفعلها ..

دخلت الحمام ..نظرت إلى المرآه .. تتفحص ذلك الوجه
الذى إمتلاً نضاره .. ثم خرجت بعدما إنتهت من غسل
وجهها وتنظيف أسنانها .. أمسكت اللاب توب ..
وفتحت "الفيس بوك" .. لاجديد..سوى ذلك الرقم الذى
يزداد يوماً بعد يوم .. ذلك الرقم الذى يعبر عن ذلك الكم
الهائل من الناس الذين ينتظرون ..متى سيقبل طلب
صداقتهم

بالإضافه إلى تلك الرسائل الغريبيه التى تتلقاها كل يوم
.. " ممكن نبقا صحاب ؟" ... "هاى ممكن
نتعرف؟" .."صباح الخير على أحلى مُزه فى مصر
" .."أنا ولید مش متجوز وعايش لوحدى " ..
" شركه مصر للطيران تبلغ سيادتكم بأنه تم قبولكم

- بالوظيفة التي تقدمتم لها .. "...."
- "yeeeeeeeees" .. قالتها قافزةً من على السرير ..
- راكضةً خارج غرفتها .. تتجه نحو تلك القارنندا .. حيث
كان يجلس والدها
- .. بيده كان ذلك الجُرْنال العتيق .. وفنجان القهوة يتأرجح
بيده الأخرى .. عندما طبعت قُبْله على خده .. فإلتفت لها
: شكلك مبسوطه ..
- أيوه مبسوطه .. مبسوطه أوى .. مبسوطه جداً
- طب ما تفرحيني معاكى ..
- حزر كده ..
- إتفتنى مع هشام على معاد الفرح ؟!
- ممم لأ ..
- لقتى السلسله اللى عليها صوره أمك الله يرحمها ؟
- يا ريبيبيت ... بردو لأ ..
- خلاص قولى إنتى ..
- فاكروظيفه مضيعه الطيران اللى كنت مقدمه فيها ...
- يااااه ده أنا نسيت .. إيه حصل ؟
- قبلونى ..
- مبروووك .. قولتى لهشام ؟

— لسا... هيفرح أوى .. هروح أتصل بيه ..
 — ماشى ..
 تركته بعدما طبعت فُبله أخرى على خده.. عائدةً إلى
 غرفتها ...

* * *

كان يبدأ يوم جديد.. عندما خرج من شقته ..وإتخذ
 الأسانسير هبوطاً... ثم خرج منه ماراً بعم غريب البواب
 : صباح الخير يا عم غريب ..قالها بعدما تخطاه ..
 — صباح النور يا أستاذ هبيشام...
 عاد له بعدما سمع ذلك الإسم "هبيشام" : يا عم غريب
 قلناك ميت مرّه إسمى هشام ..مش هبيشام — لا مؤاخزه
 يا أستاذ هبيشام ..
 — برده؟!...!! بقولك إيه.. هما مين الناس اللي سكنوا
 فى العاشر دول ؟
 — أه..قصدك أستاذ رفعت وبنته الأنسه مران..
 — إسمها إيه؟!
 — مران
 — إيه الإسم الغريب ده .. وهما جاينين منين يا عم

غريب ؟

— مش عارف ... خد يا واد يا حسين ما سقيتش الزرع
ليه ...

إنشغل عم غريب بالزرع الذى لم يسقيه ولده حسين...
بينما إتخذ هو طريقه إلى مكتبه..

يعمل بمكتب هندسى.. كمهندس ديكور.. لديه حس عالى
ومُر هف لذا يعشق الألوان مما جعلها تعشقه.. فعندما
تعشق شيئاً بصدق.. لا يجد مفرأ سوى أن يعشقتك..
يهتم بأدق التفاصيل.. فكل تفصيله.. ما هى إلا تفاصيل
أخرى لا يراها من يهتمون بالمظهر الخارجى..
ولا يعرفون أن المظهر الخارجى لا يكون جميلاً
إلا بجمال تفاصيله الغير مرأيه ...

لم ينتهى من تصميم ذلك الـ "design".. حتى جائته
فريده زميلته بالعمل.. جائته لتلقى عليه سؤالاً مُصطنعاً
كعادتها.. وهو يجاوب على قد السؤال
سأم محاولاتها للفت إنتباهه.. أو يمكن لفتت إنتباهه
زياده عن اللزوم... لا فرق..

إستأذن منها هارباً .. عائداً إلى تلك الشقه التى يسكن
فيها والتى شبهها أصدقائه بأنها مثل عش العصافير..

ربما قالوا ذلك لوجود ذلك القفص الذى يحتوى "بندق"
 و"سمسمه" .. هكذا سماهما .. وهكذا يناديهم .. يتحدث
 إليهم أحياناً هارباً من الوحده ..
 بينما يجيبون بكلمه واحده " سوسوسوسو" .. لكنه يفهمهم
 .. كما تعودوا هم فهمه .. فعندما يجدوه جالساً شريداً .. لا
 يجد من يشكى له همومه .. يقومون هم بدورهم بالتعريد
 لينتشلوه من شروده ليجيبهم : لا يا سمسمه متقلقيش
 .. مش زعلان ولا حاجه .. كل الحكايه إن الوحده بدأت
 تخنقنى ...

بس غريب إنى لسا فاكر أحس بالإحساس ده دلوقت
 .. منا طول عمرى وحيد ...

— سوسوسوسو

— من يوم ما شوقتها يا سمسمه

— سوسوسوسو

— ههههه أيوه يا بندق شكلها غمزت ..

... عاد من المكتب ليتخطى عم غريب ثانيةً ...

حمد الله أن عم غريب لم يلاحظ قدومه ، حتى لا يقول
 له أستاذ هيشام تلك ..

ركض نحو باب الأسانسير عندما رآه على وشك

الإغلاق.. لحقه بطرف قدمه على آخر لحظه.. ليُفتح
 الباب فيجدها هي ثانية.. لم تكن تكثرث.. فكانت تتحدث
 في الموبايل.. صدمته المفاجئه وأخذ عقله عشره ثوانى
 للإستيعاب.. تأخر برد فعله.. لم يدخل.. ولم يترك
 الأسانسير يصعد فى سلام.. فسمع صوتها لأول مرّه :
 يا أستاذ لو سمحت.. هتدخل ولا لأ؟!..
 — هاااا!... أيوه هدخل..

دخل الأسانسير .. ألح عليه عقله بأن يفتكس هذه المرّه..
 وإلا سيقا الحال على ما هو عليه .. وجاء خجله ليضفى
 عليه إحتمال التردد..

— إيه يا بنتى بتقولى إيه؟!.. أصل أنا فى الأسانسير ...
 اللى يمشى مع الأحمر؟!.. هو إنتى بتختارى ألوان
 دهنات الشقه؟!... الأحمر.. الأحمر...

— الأصفر... قالها بينما كانت تفكر .. رافضاً أن يضيع
 تلك الفرصه أيضاً.. وخصوصاً بأن الكره أصبحت فى
 ملعبه ...

نظرت له نظره بإستغراب يتخللها شئ من الإشمئزاز ..
 وكأنها تود أن تقول له " وأنت مالك إنت " ..
 لكنها قالت : مش عارفه والله يا شوشو.. لما أطلع الشقه

هفكر وأقولك رأيي..

أنهت المكالمه وصمتت وكأنها إكتفت بتلك النظره التى
 سحبت جميع مياه جسده لتخرج فى صوره عرق...
 لكن شيئاً ما أمره بأن يكمل .. بأن يستغل الفرصه
 — على فكره اللون الأصفر أكثر لون بيمشى مع
 الأحمر ... وخصوصاً فى الدهنات .. لأن اللون الأحمر
 بيوحى بالإثاره.. والأصفر بيوحى بالدفئ..
 فلما يتعمل منهم "mixture" .. يبدو اللون الأورانج
 المحمر.. ويببقا فى طاقه الإثاره والدفئ مع بعض..
 نظرت له مجدداً.. ولكن بدون أى نوع من الإشمئزاز
 .. فقط بدهشه..

فأردف ليحو دهشتها : متستغربيش.. أنا هشام
 فاروق.. مهندس ديكور.. جاركو فى الدور التامن..
 — أهلاً وسهلاً..
 — أهلاً بحضرتك..

— يا حظك يا شوشو.. يوم ما تسألنى سؤال .. يجاوبك
 عليه متخصص بذات نفسه .. قالتها بعدما زال جو
 التوتر ... فكانت كلماته صادقه .. تصل إلى الإحساس
 بسهولة .. إختارها بعمق لينول مراده ..

لكنه أردف جاهداً في إستغلال ما وصل له من تقدم :
هو إنتى ساكنه فى الدور الكام ؟
— العاشر..

— هههههه آمال إحنا وصلنا الدور التلاتشر بالسرعه
دى إزاي ..

نظرت إلى أزرار الأسانسير .. فوجدت رقم تلاتاشر قد
أضاء..

إبتسمت لملاحظته.. وأجزمت أنها لم تشعر بالوقت :
فعلاً إحنا وصلنا للدور التلاتاشر بالسرعه دى !!

.. وبعدين إنت مش قولت ساكن فى التامن .. ضغطت
على تلاتاشر ليه ؟!...

— مأخذتش بالى...قالها وضغط على رقم عشره بينما
وجه سؤالاً : بس إنتى مقولتليش إسمك إيه ؟...

— مرام..

— مران !!

— مرام.. بالميم يا بشمهندس..

علت ضحكاته عندما سألته : بتضحك على إيه ؟

— ولا حاجه...

— وبعدين إيه حكاية مران دى ..البواب برده مصمم إن

إسمى مران .. فى الرايحة وفى الجايه .. حمد الله على
 السلامه يا أنسه مران .. وكزا مرّه أققوله .. يا عم
 غريب إسمى مرالام .. مفيش فايده .. لسا قايلى مران قبل
 ما أطلع ..

— هههههه عاى عاى .. منا ياما قولتله إنى
 ما إسمىش هيشام .. ولا حياه لمن تنادى ..
 — دى هوايه عنده بقا .. قالتها ضاحكه ليشعر هو بأنه قد
 نال مُرادَه .. فكما أفتعه عمرو دياب مسبقاً .. " ضحكت
 ؟.... يعنى قلبها مال " ...
 ... كان هذا اللقاء الثانى ...

* * *

دخلت غرفتها .. تناولت الموبايل .. تعبت بشاشته ثم
 وضعتَه على أذنها ... لم تنتظر طويلاً حتى سمعت
 صوته : صباح الخير يا حبيبتى ..
 — صباح الخير يا حبيبي .. عندى ليك خبر حلو
 — أحلى منك !!! .. مظنش ..
 — طب إسألنى إيه هو ..
 — إيه هو ؟
 — فاكِر الوظيفه بتاعه مصر للطيران ؟ ..

قالتها لتشعر بنبره صوته قد خفتت عندما أجاب :
فاكر..

- بعتولى رساله بانهم قبلونى فى الوظيفه ..
- صمت قليلاً .. ثم حاول أن يخفى شئ ما ضايقه : أنا
كنت قولت إنهم فرکشوكى..
- لا مفرکشونيش... قبلونى .. أنا فرحانه أووووى
— مبروك
- بتقولها من غير نفس ليه ؟
- عادى يا مرام ..
- مرام !!!
- قصدى يا حبيبتي ..
- فى إيه يا هشام ؟
- مفيش يا مرام ... مفيش.. واضح إنك نسيتى إنى كنت
رافض الموضوع .. وواضح إنك لما قولتلى إنك
صرفتى نظر عن الموضوع ، مكنش علشان ترضينى
زى ما قولتلى .. صرفتى نظر علشان مكنش وصالك رد
..
- صمتت .. لم تكن تجد شئ يقال .. فدائماً ما تعجز أمام
صراحتة فى الحديث..

— ما تردى .. ساكته ليه ؟

— أققول إيه ؟ .. إنت عارف إنى طول عمرى بحلم

بالوظيفة دى .. وبرغم كده رفضت من غير أسباب ..

— من غير أسباب !! .. ولما قولتلك إنى رافض الوظيفة

دى علشان هتخليكى مسافره طول الوقت وهتبعنا عن

بعض .. مكانش سبب كافى ؟!

— منا قولتلك إن اللى بيحبوا بعض مبتفرقش بينهم

المسافات .. ممكن يكونوا قدام بعض طول الوقت وهم

فى الحقيقه بعيد عن بعض ..

— ده كلام بنقوله علشان نخدع بعض بيه ..

اللى بيحبوا بعض مبييقوش عاوزين يبعدوا عن بعض

لحظه ..

— قصدك إنى مش بحبك ؟ ..

— مش ده قصدى .. يا مرام يا حبيبتي علشان خاطرى

بلاش الوظيفة دى .. شوفى أى وظيفه تانيه أنا معنديش

مانع ..

— ماشى يا هشام ... ماشى .. أووووف .. بكرهك ..

أنهت الإتصال .. وظلت تبكى لإحساسها أن حلم العمر

يضيع .. والأصعب أنه يضيع منك بعدما تصل إليه ..

كان يعلم أنها حساسه .. ومن المؤكد أنها تبكى الآن ..
 لكن بعض البكاء يهون مادام فى سبيل بقائها جانبه ..
 ذهب كالعاده ليحكى ما حدث لسمسمه وبنديق .. فلاحظ
 أن بنديق يشاركه الرأى .. بينما كانت سمسمه حزينه ..

* * *

إستيقظ من النوم ليدرك أنه قد غفل أمام اللاب توب
 بعد عدد كبير من الـ "refresh" .. فتح اللاب
 توب مجدداً .. وكالعاده .. لا جديد ..
 فمارس ما يفعله كل يوم .. الذكريات ..
 تذكر ذلك اليوم الذى كانت تنام على فخذة .. ينظر إلى
 عيناها مباشرةً .. ويذوق منهما دوائاً يساعد على زياده
 ضربات القلب ...
 كانت يدها تتخلل شعرها المموج الناعم .. عندما فاجأته :
 فاكر يوم الأسانسير .. لما ضغطت على رقم ثلاثاشر ..
 — ده أكثر يوم فاكره فى حياتى ..
 — كنت بتستهيل .. قال يعنى ضغط على الرقم وهو
 مش واخذ باله ..
 — هههههه أيوه ..
 — أنا كمان كنت بستهيل .. كنت عارفه إنك بتعمل كل

ده علشان تتكلم معايا ..

— يعنى كنتى فاهمه وبتستهلى أه يا جزمه .. على فكره

كان دمك تقيبيل .. بصيتلى بصبه خليتيني فى نص

هدومى ..

— هههههاهاهاهاها .. أيوه فاكرها .. وفاكره وشك لما

ضرب ألوان ساعتها .. بمناسبه الألوان .. فاكر لما

قولتلى الأحمر بيوحى بالإثارة والأصفر بالدفئ .. أهو

ساعتها بقا كنت هموت وأسألك سؤال ..

— إيه هو ؟

— الأزرق بيوحى بإيه ؟

— إشمعنا الأزرق ..

— أنا أحبه .. ههههه

— هههه الأزرق يا ستى .. بيوحى بالراحه ...

— طب والأخضر ؟

— الأخضر رمز الخير ..

— طب والبينك ؟ ..

— ههههه البينك رمز الفرافير ههههه

— إزاي يعنى ؟

— أصل عندنا فى التصميمات إسمه بمبى ..

— والأسود بيوحى بآيه ؟

— بالحزن..

* * *

كان يوماً غريباً .. عندما كان بالمكتب .. تحاوطه
تصميماته..

كانت فريده تستتر وراء مكتبها أمامه تماماً..

لكنه لم يلاحظ اليوم تلك النظرات التي كانت دائماً
تختلسها من أوقات العمل نظراً له .. لم يعبأ ..

ربما ملّت محاولاتها معه دون جدوى ..

إنتهى من آخر تصميماته وكالعادة إتخذ طريقه إلى شقته

.. وكالعادة أيضاً مرّ على عم غريب : صباح الخير يا
عم غريب ..

— صباح النور يا أستاذ هشام ..

تخطاه كالعادة لكن شيئاً ما لفت إنتباهه .. "هشام"

لم يكثرث ربما قرر عم غريب الإستفاده من أخطائه
وتصحيحها ..

دخل الأسانسير .. وضغط زر يحمل رقم ثمانيه ..

دخل شقته الفوضيه دائماً.. وألقى بمفاتيحه على إحدى

قطع الأثاث كما تعود .. دخل غرفته وبدل ملابسه ..

وأخذ الطعام لعصفوريه اللذان من المؤكد أنهما يتضوران جوعاً.. فأراد أن يصبرهما بكلماته حتى يصل للشرفه : انا جبت الأكل و جااى أهو ياااا.....
 إنقطعت كلماته فجأه .. وألقى بالطعام راكضاً نحو القفص الذى لم يكن به سوى بندق.. والذى لا يوجد أى شئ يدل على أنه أصبح يصنف تبعاً للكائنات الحيه ..
 وجده ممدداً وحيداً .. ووجد باب القفص مفتوحاً ..
 أخذ عده ساعات ليستنتج أن باب القفص قد فُتح بطريقه ما .. لتختار سمسمة أن تفارقه .. ولكن لم اليوم تحديداً؟! .. فهو لم يحبسهم قط .. كان هذا القفص للحمايه وليس للحبس .. دائماً ما كان يتركه مفتوحاً ..
 ولا يغادرانه .. لم يطمعا يوماً بحُريه .. لأهم كانوا أحراراً بالفعل .. فلماذا إختارت سمسمة طريق الحريه الزائفه .. تاركةً بندق .. الذى من الواضح أنه رفض أن يسلك طريقها ..
 بل ولم يستطع أن يعيش بدونها ..
 كانت هذه من المرات القليله التى يبكى فيها ..
 إتصل بمرام .. فأجابت بعد مكالمتان فائنتان ..
 أخبرها بما حدث .. فأخبرته أنها طيور خلقت لتعيش

حره طليقه ..

لم تقتنع يوماً بأفكاره .. ولم تقتنع يوماً بذلك الققص ..
طلب منها أن يراها ... تمنعت بكثير من الأعذار لكن
إصراره أجبرها على اللقاء ..

لم تأخذ وقتاً طويلاً لهبوط دورين .. ولم تأخذ وقتاً
لضغط زر الجرس .. فُتِح الباب فور وصولها أمامه ..
دخلت فوجدته منهاراً .. ذهبت إلى الشرفه وتبعها ..
ألقت نظره على الققص .. ثم جلست ونظرت له لتضفى
على الموقف إتهاماً : إنت السبب ..

— أنااا !!؟

— أيوه .. مكانش كفايه إنك تفتحلهم الباب وتسيبهم
براحتهم .. كان لازم تديهم كامل حريتهم .. تسيبهم
يطيروا .. ولو رجعوك تانى بيقا عمرهم ما هيضيعوا
منك ..

— إنتى اللى بتقولى كده !!

— أيوه أنا يا هشام ..

— هشام !!!

— بص يا هشام أنا فكرت كثير فى موضوع الوظيفة ..
وقررت إنى مش هفوت الفرصه منى .

— قصدك إيه ؟
 — أنا هروح إستلم وظيفه المضيفه ..
 — لأ.. أنا مش موافق .. مش هتروحي ..
 — أنا خلاص قررت ..
 — يعنى إيه قررتى ؟ .. هو قرارك لوحديك ..
 — أيوه قرارى لوحدي .. دى حياتى وأنا حرّه فيها
 — مرام .. يا أنا يا الوظيفه دى .. إختارى ..
 — مصمم تحتفظ بالقصص اللي عاوز تمتلكنى جواه
 وتحبسنى .. طيب أنا إخترت يا هشام .. دبلتك أهيه ...
 وضعتها على الطاولة .. وتركتهم مغردةً ..
 ليدرك أنها إختارت نفس الطريق الذى إختارته سمسمه
 ..
 لتتركه يلاقى نفس مصير بندق ...
 ... كان هذا اللقاء الأخير...

التابوت الثانى

الأنثى ليست جسد

يا مسا الجمال ... قالها مُدحرجاً التماسى على أصدقائه
..الذين يجتمعون هنا ثلاث أو أربع مرات أسبوعياً
..خاصاً يوم الخميس..

أهلاً بالعريس .. أقعد كده وقولنا عملت إيه .. قالها
صديقه وائل المتزوج منذ ثلاثه أعوام..
تلاقيه معملش حاجه ... كان هذا بهاء المتزوج منذ
خمسه أعوم..

جرا إيه يا جدعان .. عيب عليكموا ده إحنا جامدين أوى
.. قالها هو من باب الفشخره..
طب أقعد ..كلكوا بتقولوا كده فى الأول ..كانت هذه فداء
... أنسه..

إستنوا بس لما أتجوز .. وإتفرجوا بقا على الأعضاء
الى هنتطابير والأشلاء المنتاثره .. إقتحم بها أحمد

متقف القاعده ..

لكى تعقب عليه نجوى المطلقة : هاهها بر دو كلكو
بتقولو كده .. وساعه الجد .. بتقلبوا على بطة بلدى ..
قالتها لتتعالى ضحكاتهم جميعاً ..

بس بقا لما نسمع الوحش عمل إيه .. قالتها فداء ناظرةً
إليه .. لتأخذه الحماسه وبدأ فى سرد الأحداث : عملنا
كل حاجة .. كل حاجة ..
بهاء : إبتدينا نكذب ..

— طب وحيات فِدا اللى هتموت وتعرف دى .. عملنا
كل حاجة

وائل : دى طلعت خبره بقا ..

— ما تلم نفسك يا وائل ..

ههههههه أهو هيتقمص من أولها .. قالتها فداء نافخةً
دخان شيشتها التفاح فى وجهه ..

— مش حكاية بتقمص .. أنا بحبها ...

أحمد : حد سمع هو قال إيه ... حد سمع اللى أنا سمعته
... بتحبها .. يا أخى (....)

نجوى : ههههههه بتحبها ... وده من إمتى .. على أساس
إنك صحيت من النوم لقيت نفسك متجوزها .. أمال اللى

كنت بتحكيه عنها فى الخطوبه ده إيه!
 — متوجعوش دماغى ... النهارده الخميس وكل أسبوع
 وإنتوا طيبين .. الكلام على إيه؟ ..
 وائل : الليله عند أحمد .. بيقول مجهزلنا فيلمين عنب ..
 وصفقه كميا محترمه ..
 — كده ناشفه؟! ..

أحمد : ما إنت فاهم العمليه نايمه اليومين دول ..
 — أهم حاجه الكميا تكون نضيفه .. علشان لسا الغريبال
 جديد وليه شده ..

نجوى : دلوقت عاوز كميا .. مش كنت مقطع السمكه
 وديلها من شويه ..

— ما إنتى فاهمه يا نوجه .. الكميا بتسند برده ..
 فداء : طب مش يلا بينا .. ولا هنروح حفله نص الليل

..

يلا بينا ... رددوها جميعاً فى أنفاس متداخله ..

* * *

كانت هى تنتظره عندما تأخر .. تتصل به بسرعه
 مكالمه لكل دقيقه ... ولم يجب ..
 زاد قلقها كثيراً .. خصوصاً بعدما إتصلت بأمه وأخته

ولم تجده عندهم .. بل وإتصلت بأصدقائه ..
أصدقائه التي تعرفهم .. وليست الشله السريه التي
ينتمى لها بشكل أو بآخر..
لا تعلم ما المفترض فعله .. أتجوب الشوارع باحثاً
عنه؟! .. ظلت تفكر .. وتفكر ..
حتى سمعت صوت الباب يُفتح .. ركضت نحوه ..
تتفحصه إن كان سليماً : إنت كويس ؟!!..
— كويس .. فى إيه ؟
— إتأخرت ليه كده يا شريف .. مش عارف إن أنا بقعد
أستناك وبقا قلقانه عليك ..
— وتقلقى عليا ليه هو أنا صغير ؟!
— لا يا حبيبي مش صغير .. بس بخاف يكون جراك
حاجه ..
— طب فكك من الهبل ده وهاتيلى أكل .. إتعشيتى؟
— لأ...
— طب يلا علشان نتعشا .. يلا علشان ليلتنا فل النهارده
..
تجاهلت تلميحاته وذهبت لإعداد شيئاً يأكلانه ..
هى فقط لا تحب أن تأكل بدونه .. تحب أن تتأمله فى كل

أحواله .. حتى تلك الأشياء التي تتطاير من فمه عندما يأكل .. تحبها ..

كالعاده أخذ يأكل بشراهه .. وهى بتتفتق جنب منه .. إنتهى من صراعه مع الطعام ثم نظر لها .. فوجدها تراقبه .. مبتاكليش ليه .. قالها بعدما نسف الطعام..لتنظر هى للأطباق الخاويه مبتسمه : أكل إيه؟ .. هو فاضل حاجه تتاكل ..

— طب يلا بينا ...

— فين ؟ ... نُخرج .. الله من زمان ماخرجناش سوا .. هقوم ألبس ..

همّت بالنهوض عندما إستوقفها بيديه لتجلس مكانها : نخرج نروح فين ؟ .. إنتى عارفه الساعه كام دلوقت ..الساعه ٥ الصبح...

— وإيه يعنى يا شريف .. ما إحنا كنا مخطوبين وبننزل فى الوقت ده .. وبعدين مش إنت اللى كنت بتقولى إن ده أحسن وقت ننزل فيه .. وبيبقا الجو جميل وبنشوف الشروق.. والشوارع فاضيه مش إنت اللى قولت كده

— الكلام ده وإحنا مخطوبين .. لكن دلوقت يا حبيبتى

إحنا متجوزين .. يعنى مش مفروض نضيع وقتنا فى الكلام الفاضى ده ..

— كلام فاضى !!... هيا الذكريات الجميله ما بينا كلام فاضى يا شريف .. وبعدين قولى مفروض نضيع وقتنا فى إيه ؟.. فى السهر بره لحد الفجر كل يوم؟!.. يا شريف أنا مبقتش بشوفك .. طول النهار سايبنى قاعده لوحدى ..

إقترب منها .. ونظر فى عيونها نظرّه تعشقا .. فنسيت كل شئ.. أهداها قُبلة ساخنه على عنقها .. فشعرت وكأنها تذوب مثل قطعه الثلج .. هو يعلم تأثير تلك القبله على الأنثى .. لذا إستغلها لتتسى كل ما قالت .. لتذوب فى فمه مثل فتافيت السكر.. وينال مراده من ذلك الجسم طاغى الأنوثة. إستسلمت له سريعاً .. وكان مفعول الأدويه التى تنوالها إعداداً لتلك الليله قوياً..

إستيقظت فى صباح اليوم التالى فلم تجده بجانبها .. نهضت تبحث عنه فى كل أرجاء الشقه .. فلم تجد له أثراً .. كانت تحدث نفسها .. يا ترى أين ذهب ؟... اليوم الجمعه ولا عمل !.. أين إختفى مجدداً...

* * *

وادی شریف بیه وصل ... قالتها فداء .. نافخة دخان
شیشتها التی لا تفارقها.. ما دامت تجلس هنا .. فی
الفیشاوی ..

Page | 31

فهم یحبون السلطنه .. ولهذا المكان ذکرى معهم .. فهنا
تجمعوا جميعاً یوم لم یکن أحداً منهم یعرف الآخر ..
یوماً تغیر بعده کل شیء ..
یوماً كانت تجلس فیہ نجوى .. كانت تحاول التحکم فی
میاہ عیناها .. لا تصدق أنها أصبحت مطلقه منذ نصف
ساعه ..

ظلت تفکر بینما كانت محاولاتها للسيطره على دموعها
قائمه .. " لیه عمل فیا كده .. ده أنا بحبه .. والله العظیم
بحبه "

كانت تلك لحظه اللا تحکم .. اللا سیطره ..
لحظه تجد عیناک قد طفحت بما تحبسه .. لحظه
الإنفجار .. عندما تبكى متأوهاً .. قد أنهك قلبك ..
وجارت عليك مشاعرك .. یوم یأتى الجرح من هؤلاء
الناس الذین من المفترض علیهم أن یضمدوا جروحك
..

توابیت العشق

.. يوم يأتي الموت من سفاحين الحب ..
حينها وقف وائل صائحاً.. لتتوقف فقرات الطرب حوله
.. وقف صارخاً بالجالسين : محدش مرتااا اح ... إنت
مرتاح ؟ .. قالها لذلك الرجل الذى كان يجلس مع
زوجته ..ظنه الرجل مجنوناً فأراد أن يهاوده مجاباً :
لا مش مرتاح ..
إنتى مرتاحه ؟.. قالها تاركاً الرجل متجهاً نحو شابه
جميله .. ترتدى بنطلون جينز قد أحكم قبضته على
نصفها السفلى .. وبلوزه قد غطت قليلاً من نصفها
العلوى ... نظرت له تلك الفتاه قائلةً : أقعد يا أهبل ...
— إيه ؟!.. قالها غير مصدقاً أذنه .. عندما صاحت هى
بوجهه : غور من وشى .. هو أنا ناقصاك ..
— إنتى إزاي تكلمينى بالطريقه دى ؟
— وإنت مين سمحك تيجى تتكلم معايا أصلاً ؟
— ليه هو إنتى مين يعنى .. كيم كارديشيان ؟..
— يا راجل إنت إمشى من وشى .. يا .. يا ..
يا مستفز ..
— إنتى قليله الأدب ..
— طب شوف قله الأدب اللى بحق وحقيق .. قالتها

عندما أمسكت بكوب العصير لتسكبه بوجه وائل .. الذى
 نظر لها نظره حاده .. وكأنه يريد أن يقتلها .. تجمع
 الناس وأخذوه من أمام تلك الأنثى الغاضبه .. سحبه من
 أمامها بهاء قائلاً : إنت غلطان .. عجباك وروحت
 كلمتها .. مأخذتش منها ريق حلو .. تمشى على طول ..
 وبعدين مفروض متروحش تكلم واحده غير لما تلاغيها
 الأول بعنيك

إتلاغت .. دوس يا معلم .. ما إتلاغتش بيقا متخرجش
 نفسك ..

هرش بهاء الموقف .. هرش أن كل ما يفعله وائل كان
 مجرد أسلوب مبتكر للإيقاع بالفريسه .. لكنها لم تأكل
 الطعم .. بل شربته عصيراً بدون مقابل ..
 شعرت الفتاه بأنها قد أخطأت .. وتمادت برد فعلها ..
 فذهبت له قائلةً : أنا .. مميمم .. أسفه .. أنا مش عارفه
 عملت كده إزاي .. سورى ..
 نظر لها وائل : ولا يهملك .. قالها وأشاح بوجهه بعيداً
 عنها ...

— شكلك لسا زعلان .. عموماً أنا أسفه مرّه ثانيه
 همّت بأن تذهب لكن إستوقفهما ذلك الشاب أحمد : أنا

عرفت إن كان فى خناقه من شويه .. وواحد ضربت
واحد بالكوبايه فى وشه .. حضرتك صح .. باين عليك
.. معاك أحمد شحاته .. محامى ..

كان يتحدث مثل القطر عندما يندفع ولا يستطيع أحد
إيقافه .. ممكن نرفع عليها قضيه يا باشا .. ونجرجرها
فى المحاكم .. بس خليك ورايا وأنا أزبطها لك .. قولى
قاعده فىن ؟ شاور عليها بس .. وأنا أجيبك عيل شرده
يزرفك تعويره فى كتفك .. نروح نعمل تقرير ونعمل
محضر .. ما تسكتش على حقك يا باشا .. شاورلى
عليها بس ..

قال كل هذه الجمل فى أقل من ربع دقيقه ..
بينما كانت هى واقفه بجانبه تتعجب سرعته فى الحديث
.. عندما قال وائل : لالا لا .. أنا سامحتها خلاص ..
— يا بيه .. حد يسيب حقه لمره ..

خطفت أذنها تلك الكلمه فنظرت له وأمسكته من ياقه
القميص : نهارك أسوود ... أنا مره ..
نظر هو لها .. ما هذا الجمال .. وكعاده أى رجل
مصرى يشعر بالضعف أمام جمال وأنوثه إمرأه
: أ(...) ... ده أنا اللى مره .. أنا أسف يا قمر ..

هاااار أسود على الجمال يا جدعان ..
 أثارت كلمات أحمد غيره وائل المصطنعه : خلاص يا
 متر بقا .. قولنا مش هرفع قواضى .. أنا سامحتها ..
 — لازم تسامحها ياباشا .. اللي زى دى لو ماسامحتهاش
 .. ربنا عمره ما يسامحك ..
 — ما خلاص يا عم مش شايف إنك زودتها ..
 — طب بوراحه .. الله ... قالها ذاهباً لتتظر هي لوائل
 قائله : شكراً ..
 — على إيه بس ..
 — إنك ما سمعتش كلامه .. شكله راجل يحب الشر ..
 — ههههه ولا يهملك حصل خير
 — أيوه ...
 — طب إتفضلى أقعدى .. لا مرّه ثانيه أنا إسمى فداء
 وباجى هنا دائماً ..
 — أهلاً بيكى .. إسمك جميل على فكره
 — ميرسى ...
 إلحقونا يا ناس ... حد يجيب إسعاف بسرعه ..
 كان هذا شريف .. كان يمسك بجسد نجوى الملقى على
 الأرض بعدما قطعت يدها بطرف كوبايه مكسوره ...

لم يجد شريف أى إستجابيه سوى هؤلاء الناس الذين
تجمعوا للمشاهده .. بينما حملها هو .. لكنها كانت ثقيله
.. فوجد رجلاً يحملها معه .. كان هذا بهاء .. أراد وائل
أن يفعل شيئاً أمام أعين فداء .. فدخل ليحملها معهما ..
بينما قالت فداء : إستنوا الإسعاف هنتأخر .. هاتوها فى
عربيتى ..

ركبوا هم الخمسه وذهبوا إلى المستشفى .. بينما لحقهم
أحمد .. ظناً أنه من الممكن أن يعود من هذا الحادث
بمصلحه ...

كان هذا يوم لقائهم الأول بالفيشاوى ...

* * *

كنت فىن تانى يا شريف ..

— جرا إيه يا هاله .. كل ما هاتشوفينى هتقوليلى كنت
فىن ... قالها غاضباً ملوحاً بيده ..

— خلاص يا شريف متزعلش نفسك .. أنا أسفه يا

حبيبى ..

— حبيبى إيه وزفت إيه .. أوعى من قدامى كده .. فالحه
بس تقورى دمي .. أزاحها بيده كأنه يزيح قطعه أثاث
بالمنزل .. تاركاً إياها متجهاً نحو غرفته ليغرق فى

النوم ... بينما جلست هي تبكى..
لا تبكى لما قاله قدر ما تبكى تحسراً على حالها ..
تذكرت كلمات شيرين .. وظلت ترددها ..
" ده مش حبيبي .. ده حد تالانى .. فين رفته .. حنيته ..
خوفه عليا ... فين الكلام الحلو اللي قالو ليا ... مبقتش
شايفه منه إلا يادوب ملامحه ... وحتى دى مبقتش برده
هيا هيا ...

حبيته ليه وإزاي قدرت أعمل كده .. كان عقلي فين
شكلى عملت فى نفسى عامله .. فاكر يا قلبى فى يوم
زمان أنا قولتلك .. ماتحاولش تشوف حقيقه حد كامله
... "

لم تكن تعلم أنها لم ترى حقيقته كامله بعد ..

* * *

مالك يا شريف .. قالتها نجوى ..
— مش عارف .. حاسس إني ظلمت هاله لما إتجوزتها
.. بتحبني وأنا مش قادر أحبها ..
— لو مبتحبهاش طلقها ..
— بحبها .. بس مش زى ما ...
قاطعته : بص يا شريف .. أنا فاهمه إنت عاوز تقول

إيه .. بس صدقتى .. وصدقنى أوى .. لما أقولك إن
 أكثر حاجه توجع الست .. إنها تحس إن جوزها مش
 شايفها غير جسم حلو بياخد متعته منه وخلص ..
 لما تحس أنه بيعاملها زى أى كرسى مرمى فى البيت ..
 واللى بيوجع أكثر .. لما الست تحس إن أنوثتها مش
 ماليه عين جوزها ..

إنت عمرك ما سألتنى أنا إطلقت ليه .. صح ..
 — ما أنا ما سألتش علشان كلنا متفقين محدش يسأل
 التانى عن الماضى بتاعه أياً كان .. دى كانت قاعده من
 قواعد صداقتنا القدره ولا ناسيه ..
 — ههههه لا مش ناسيه .. بس أنا هسمحك تكسر
 القاعده المرّه دى وتسالنى ..

— طب إطلقتى ليه ؟
 نظرت له وقد تبدلت ملامح وجهها .. عبست وبدأ الدمع
 يتكون كيوادر لإحدى لحظات الانفجار : أنا كنت عامله
 زى القطه المغمضه .. معرفش حاجه عن أى حاجه ..
 لما قابلت كريم حبيته .. كان
 جينتل .. لطيف .. رقيق .. يخاف عليا .. بيحبنى ..
 ولا بلا بلا بلا ... زى ما إنت فاهم .. وأنا كنت لسا مش

عارفه حاجه

مش قادره أميز ما بين حد بيحس نحيتي بمشاعر حقيقيه
.. وما بين حد بيمثل عليا مشاعره ..

صدقته وحببته وإتجوزنا ... بدأت مشاكلنا تظهر لما
بدأت أحس الحقيقه .. مبقاش يخش البيت غير الفجر ..
مبقتش أشوفه لدرجه إني نسيت إني متجوزه .. ولما
بشوفه يقعد يز عقلى دى وسخه ليه .. ما عملتيش الأكل
اللى بحبه ليه .. أى حاجه يتخايق بيها معايا وخلص ..
وبعد كل خناقه عاوزنى أبقا عادى .. تحت أمره مستتياه
بقميص النوم ..

ويا ريتها جت لحد كده .. الحيوان إبن الكلب ..
كان مرّه جايلى واحده مومس وعاوزنا معاه إحنا
الإثنين ...

مسح هو دموعها التى خرجت فى لحظه اللا تحكم
قائلاً : يااااه يا نجوى ده إنتى طلعت حكايتك حكايه ..
— علشان كده لما طلبت منه الطلاق .. وإطلقنا فعلاً
..قررت أعرف كل حاجه عن العالم اللى هو فضله عليا
.. اللى كان واخذ كل وقته .. وعقله .. وتفكيره ..
وبقيت زى منا دلوقت .. فى نظر الناس واحده صايغه

وَمُنْحَلِه .. مش مهم .. بس المهم أنا إيه فى نظر نفسى
 .. طبعاً إنتوا نفسكوا فاكرين إنى واحده مطلقه وبتسمع
 أفلام قبيحه أكيد مدوراها من وراكوا .. بس صدق أو
 متصدقش .. أنا مفيش راجل لمسنى بعد كريم .. قصدى
 الحيوان .. أصلاً مبقنتش متخيله إنى هسمح لراجل
 يبصلى نفس البصه .. يشوفنى جسم وبس .. علشان كده
 لو إنت بتبص لهاله البصه دى .. طلقها أحسن .. أو حبها
 .. هاله إنسانه جميله وروحها حلوه وتستاehl تتحب
 شوف روحها يا شريف قبل ما تشوف جسمها ..
 صدقتى هتكتشف فى مراتك حاجات حلوه كتير عمرك ما
 هتشوفها وإنت بتبصلها على إنها جسم وبس ...

* * *

شريف .. قوم يا شريف ...
 — فى إيه يا هاله ..
 — من ساعه ما جيت من الشغل وإنت نايم .. قوم علشان
 نتعشا ..
 — نتعشا !! .. هيا الساعه كام ؟
 — الساعه عشره بليل ..
 — ياااه أنا نمت كتير أوى ..

- يلا قوم عاملالك أكله بتحبها ...
 نهض مسنداً ظهره على السرير .. يدلك عيناه من آثار
 النوم الطويل : أكله إيه ؟
- مكرونه باشاميل .. بس هتاكل صوابعينك وراها
 — صوابعيني .. طب وسعى أنزل ..
 — ما المكان واسع أهو ولا لازم تنزل من المكان اللي
 أنا قاعده فيه ..
 — بطلى لماضه وعديني ..
 — ههههه إتفضل
 — تصدقى بتبقى زى القمر وإنتى بتضحكى ..
 — لسا واخذ بالك؟! !!
 — تصدقى أه ..
 — يااه يا شريف من زمان مقولتليش كلام حلو
 — علشان أنا متجوز الحلو ذات نفسه .. فمش هياثر فيه
 حلاوه الكلام ..
 — لاااااااااا ده إنت النهارده تتحسد .. إنت سخن ولا
 حاجه؟!
 — هههههه ما بلاش سخن دى .. متفكرنيش .. أنا
 بحاول أنسى الموضوع ده

- موضوع إيه ؟
- ولا حاجه ...
- فى واحد إتصل بيك كتير .. إسمه بهاء ..
- عبس وجهه فجأه عند سماعه الإسم : وإنتى عرفتى
إسمه إزاي ؟؟
- ما أنا رديت عليه ..
- نعم يا روح أمك .. وبتردى على أمه ليه ..
- عادى يا شريف منا صحيتك كتير ترد ومرضتش
تصحى .. لقيت رقم غريب رن زى عشرين مره قولت
يمكن فى حاجه مهمه حصلت .. فرديت
- وقولتيله إيه ؟ .. قالها زافراً
- هو قالى فين شريف ؟ ... قولتله نايم ... قالى إنتى
مراته .. قولتله أيوه خير فى حاجه حصلت .. قالى لأ
كنت عاوز شريف .. قولتله لما يصحى هبلغه إن
حضرتك إتصلت أقفوله مين ؟ .. قالى بهاء ... وقفلت
معاه السكه .. بس
- بعد كده مترديش على حد خالص .. لا رقم غريب
ولا رقم قريب .. فاهمه ولا لأ ..
- حاضر ...

كانت تطير فرحاً .. ظنت ما قاله زوجها كان لأنه يغار عليها .. لكنها لم تكن تعلم الحقيقه .. فهو لاء الخائون دائماً ما يشكون بمن حولهم .. ظناً أن كل الناس خائنه مثلهم .. فكما قيل قديماً .. لا يخون إلا الخائن ...

* * *

فاكره يا نوجه يوم ما كنتى هتموتى نفسك وأنقذناكى ..

— وإيه اللى فكرك يا سى بهاء

— أصل عاوز أسألك سؤال ؟

— ما إحنا متفقين .. مفيش أسئله ..

— إحنا إتفقنا مفيش أسئله فى أى حاجه تخص الماضى

قبل اليوم اللى إتقابلنا فيه ..

— عاوز إيه يعنى لخص ..

— مفكرتيش تنتحرى تانى ليه ؟

— محسسنى إنى إنتحرت أولانى منا عايشه أهو

— متهربيش من السؤال ..

— لا بهرب ولا حاجه .. بس مفكرتش فى الإنتحار

لأنى إكتشفت إن السبب اللى كنت هموت نفسى علشانه

.. سبب تافه .. ميستحقش إنى أنتحر علشانه ..

— هو مين ؟

- قصدك إيه ؟ ..
- اللي كنتى هتنتحرى علشانه ؟ ..
- أنا كنت بتكلم عن السبب .. مش عن شخص ..
- ما تحوريش يا نوجه .. أنا فاهمك كويس ..
- وإحنا إتفقنا منتكلمش فى الماضى ..
- بس هموت وأعرف ...
- موت .. وبرده مش هتعرف
- إשמعنا قولتى لشريف ؟
- هو قالك إنى قولتله ؟
- لأ .. بس يوم ما كنتوا بتتكلموا مع بعض لوحدكوا
- ... كان شكلك باين عليه أوى .. وبعدين دى أول مره
- أشوفك بتعيطى ..
- عاوز إيه يعنى .. أنا قولت لشريف أو ما قولتتش ..
- مش فارقه ..
- لا فارقه .. إنتى كسرتى القواعد بتاعتنا مع واحد بيقا
- تكسريها معنا كلنا ..
- طريقه كلامك مش مريحانى يا بهاء .. ما تلفش
- وتدور عليا .. عاوز تقول إيه هات من الآخر وأنا
- هعملك اللي إنت عاوزه ..

وجدت تلك النظرة التي تكرهها بدأت تظهر فى عينه ..
 ورأت تلك الرياله التي لم تخرج من فمه بعد .. لكنها
 واضحة .. مع أول تلميح ريل مثل الأطفال الرُضع
 :طب يلا بينا ...

- هنروح فين عندك مكان؟
- معايا مفتاح شقه أحمد ..
- وأحمد فين؟
- أحمد مش هناك عنده شغل فى المكتب ..
- بس إحنا كده هنكسر القواعد يا بهاء ..
- ما هيا ماكسوره من زمان ..
- إنتى مع شريف .. ووائل مع فداء .. وأنا اللي واقع
 من قعر القفه ..
- أه يا ابن الكلب يا واطى ..
- أله أله أله .. مالك يا نوجه ..
- نوجه يا ولاد الكلب .. الحق مش عليكوا الحق عليا
 إنى عرفت أشكال وسخه زيكوا ...
- ... قالتها ونهضت مغادرةً رافضةً أى محاوله للإعتذار ...

* * *

أمال فين نجوى يا جماعه؟! .. النهارده العيد بتاعنا ..

الخميس .. وهيا رقمها غير متاح .. قالها وائل.

بهاء : تلاقيها مكسوفه تورينا وشها ..

ليه يا بهاء .. قالتها فداء

— أصلها كانت عاوزه تكسر القاعده رقم ٢ معايا .. فى

الأول لمحتلى كده من بعيد ولما عملت عيب .. قالتلى

صريحه كده .. تعالى نروح نقعد شويه فى شقه أحمد

مش إنت معاك المفتاح من آخر مره .. أصلى زهقت

من الفيشاوى .. قولتلها يا نجوى مينفعش إحنا متفقين

منكسرش القواعد علشان نحافظ على صداقتنا .. لكن

هو مين .. قعدت تزن فوق دماغى .. وإنتى عارفه يا

فداء طبعا الست لما بتبقى عايزه بتبقا عامله إزاي ..

آخر ما زهقت زعقت وياها قامت ماشيه زعلانه .

شريف : إنت كداب .. وغير إنى متأكد إنك كداب

شكلك مفضوح أوى .. والكذب باين فى عنيك وطريقه

كلامك وإيدك اللي مش ثابتة فى حته وإنت بتتكلم ..

بهاء : طبعا ما إنت لازم تقول كده .. أكمل كلماته

بصوت أعلى عندما نظر للبقية .. أصل البيه مزبط

معاها جامد من ورانا ...

شريف : أه يا ابن ال(.....) ..يا كداب ..

— أنا متأكد يا وائل .. وبعدين إحنا كده .. أى واحده
 مطلقه فى مجتمعنا بيبصولها على إنها هايجه .. يعنى
 لو نجوى مكنتش بتسمع أفلام ولا بتيجى الشقه .. كنت
 برده هتقول نفس الكلام .. وبعدين تعالى هنا .. فيها إيه
 لما تيجى الشقه إحنا مش أغراب .. إحنا صحاب
 — هاهاهاااا إنت صدقت ولا إيه .. هسألك سؤال .. تقبل
 مراتك تيجى معنا الشقه؟؟
 — لأ .. قالها بدون تفكير
 — لأ ليه؟

— علشان مراتى محترمه ... خرجت منه بتلقائيه
 — بس يا سيدى أديك غنيت ورديت على نفسك ..
 نظر هو للأرض .. لا يعرف كيف يدافع عنها .. هو
 يصدقها ويعرف أنها لا تفعل فاحشه ما .. لكنه أيضاً لا
 يستطيع أن ينزع من عقله عادات مجتمعيه تربي عليها
 تؤثر فيه .. ويؤثر فيها ..

* * *

كان عائداً للبيت بينما صدمته سياره .. فقد الوعى
 وظل ينزف .. حتى نقلوه إلى المستشفى ..
 علمت هاله الخبر فركضت لفتفتح باب شقتها مهرولةً

للخارج .. حتى أنها نسيت أنها ترتدى بيجامه ..
 التقت بهم هاله لأول مرّه بالمستشفى .. عندما أتوا
 للإطمئنان على صديق المُتعه ..
 خرج الطبيب فركضت هاله نحوه : طمنى لو سمحت
 هو كويس ؟
 — متقلقيش .. حضرتك مراته ؟
 — أيوه ..
 — متقلقيش كلها إصابات خفيفه وخدوش وكسر فى الإيد
 اليمنى .. نحمد ربنا إنها جت على قد كده
 — الحمد لله .. ربنا يطمنك يا دكتور ..
 كانوا هم الأربعة يراقبون ما تفعله هاله .. وعندما ذهبت
 مع الدكتور بدأت جلسه الفيشاوى لكن بالمستشفى ..
 وائل : شكلها بتحبه جامد
 بهاء : بس فرسه .. جامده فى الجحيم ..
 أحمد : أنا مكنتش فاكّر إن شريف متجوز واحده جامده
 بالشكل ده .. يا بختك يا عم شريف ..
 — ما تلموا نفسكوا شويه .. مش دى مرات صاحبكوا
 برده .. ولا هو مفيش نخوه بشلم .. كانت هذه فداء ...
 حينما أُر دفت .. دى شكلها بتموت فيه وشكلها مش زى

ما كان بيحكى عنها شكلها كده طيبه وملهاش فى حاجه

..

بهاء : وإنتى عرفتى منين ؟

Page | ٥٠

— إنت ناسى إنا ستات زى بعض .. من تصرفاتها
ومن تعبيرات وشها .. وحركه جسمها أققدر أققولك
...بتحبه...مبتحبوش...بتمثل عليه الحب ...ليها فى
السكه بتاعتنا ولا ملهاش..

وائل : كل ده من غير حتى ما تعرفيها ولا تتكلمى
معاها ؟

— الكلام ده لغه الخُرص اللي زيك ..

اللى ميعرفوش لغه الروح .. المشاعر ..لغه الجسد
والعينين الفصاحه..

لم يعلموا أبداً أن الإنسانه التى يدور حولها الحوار ..
تسمعهم ..

سمعت ما قيل عنها .. فذهبت لفداء تطلب منها أن
تخبرها ما قاله زوجها فى حقها .. رفضت فداء بشده
.. كذلك كان الحال مع وائل .. ولم تجد أحمد لأنه غادر
مستئذناً بسبب العمل .. لكنها عرفت كل كلمه قيلت فى
حقها .. سواء إفتراء أم لا .. عرفت بمجرد أن سألت

بهاء... لم تكن تتوقع يوماً أن زوجها يفترى على
 أخلاقها .. ولم تكن أبداً تصدق أن أصدقاء زوجها
 يعرفون تفاصيل جسدها تماماً وكأنهم يروه كل يوم
 ..بالإضافة إلى تلميحات بهاء التي تحت على إستغلال
 الموقف وغياب وعى شريف .. والذهاب إلى الشقه
 لفعل صفقه مع الشيطان .. كما قال لها ...

* * *

أخذت زوجها الذى أفاق .. وذهبا إلى الشقه ..
 مرّ شهر كامل تحملت فيه مراعاة طلباته .. بل وتحملت
 فيه النظر إلى وجه ذلك الذى يشبه حبيبها .. تحملت
 لأنها أحبته يوماً ما .. ولقناعتها أن هذا ما يجب أن
 تفعله أى زوجة أصيله بغض النظر عن دناوه زوجها
 ...

لكنه جاء ذلك اليوم الذى لم تتحمل فيه أكثر من ذلك ..
 بعدما رجع إلى صحته ونزع الجبس .. وعاود عاداته
 اليوميه بالخروج للصباح الباكر والزعيق والشخط
 والنظر .. وكالعاده يقترب منها ويقبلها لتنسى كل شئ ..
 فهكذا خلقها الله .. كائن ناعم يذوب بسهولة .. وعندما
 يذوب .. تتذوق طعماً رائعاً .. لا يقارن بأى طعم مُذاب

آخر ..

جاء ذلك اليوم الذى كان يمارس فيه عادته .. قابلت
صوته العالى بصمت غريب .. وكأنه ذلك الهدوء الذى
يسبق العاصفه مباشرةً .. أنهى جولته الكلاميه وإقترب
منها .. لكنها أبعدت رقبتها عن شفاه المغتصبه ..
لم يتوقع منها شئ كهذا : إيه يا هاله مالك .. مش
عاوزانى أبوسك ؟ .. مبتحبنيش ؟ ..
— بطل بقا ... بطل كذب بقا .. بطل خيانه بقا ..
حرام عليك أنا عملتك إيه غير كل خير ... بالكاد
أكملتها وبكت منهاره .. إنها لحظه اللا تحكم ..
— مالك يا هاله ؟ .. قالها واضعاً يده على كتفها البعيد
ليضمها ..

— إبعد عنى ومتلمسنيش .. إنت فاهم ..

— إنتى مش عاوزانى ألمسك يا هاله !!

— مش عاوزه واحد خاين يلمسنى ..

— إنتى بتقولى إيه .. أنا

قاطعته : بطل كذب .. صحابك قالولى كل حاجه ..

صحابك الوسخين ..

— ما تصدقيهمش يا هاله .. والله العظيم أنا عمرى ما

خونتك ..

— لا خونتتى ... أنا عارفه إنك منمتش مع واحده غيرى
بس خونتتى ... مش لازم الخيانه تكون بالجسم يا شريف
.. صحيح منمتش مع واحده غيرى بس طول الوقت
كنت بتخونى ..

بتخونى فى كل مرّه بتبص على جسم واحده تانيه فى
الأفلام الوسخه اللى بتتفرج عليها ، كده بتخونى
بتخونى وإنت بتبصلى كأنى واحده جاييها من الشارع
كل اللى عاوزه منها إنك تنام معاها .. كده بتخونى...
بتخونى فى كل مرّه بتتكلم عليا بطريقه مقرفه مع
أصحابك المقرفين .. كده بتخونى
بتخونى لما بتحسنى إنك متجوز واحده من ضمن
كماليات البيت .. يوم ما تتعب من الوقفه تقعد على
الكرسى .. ويوم ما تحب تريح تخش تنام على السرير
.. ويوم ما تبقا عاوز تتسلى تتفرج على التليفزيون ..
ويوم ما تبقى عاوز تتمتع تجيلى أنا بقا .. أنا زى أى
جهاز فى البيت بيشبعلك رغبه معينه .. تتخاق معايا
وعاوزنى أرميلك نفسى على السرير بكل بساطه ..
تاخذ منى اللى إنت عاوزه وبس ..

لعلمك عمرى ما حسيت بمتعته وأنا معاك فى السرير ..
 عمرى ما حسيت بحضنك .. علشان مش بتحضنى أنا
 .. بتحضن جسمى اللى أنا كرهته بسببك .. فوق يا
 شريف .. أنا مش هستحمل أعيش كده .. أوقات كتير
 بقول يمكن يتغير .. وأوقات أكثر بقول لى مفيش
 فايده .. فعلاً يا شريف سعد ز غلول كان عنده حق ..
 مفيش فايده .. طلقنى ..
 كلماتها ذكرته بكلمات نجوى له .. يا الله لا يتخيل أنه
 سيكون فى نظرها مثل كريم أو ما يعرف بينهم
 بالحيوان .. وأن مصيرها هى سيصبح مثل نجوى

التابوت الثالث

الرسالة السابعة

" هذا خطابي الأخير..

اليوم الجمعة.. ٢٠١٤/٢/٧

لا أعلم لماذا إستيقظت اليوم من نومى لأجد نفسى لا
أذكرك فور إستيقاضى .. عكس ما كنت عليه لسبعه
أعوام مضت ..
أشعر بأنى عندى رغبه مُلحه على النسيان .. هذا ما
حاولت أن أفعله طيله سبع سنوات ..
سبع سنوات مرت من عمرى هبائاً.. لم أفعل فيهم شئ
سوى أن أذكرك .. أنتِ ..
سبع سنوات لم أجيد فيهم سوى البكاء على الأطلال ..
والبحث عنك بين الأنقاض..
طالما كنت أتسائل .. لماذا تقف أحلامى عند النصف

خطوه فى مشوار الألف ميل؟؟ ..
 وربما اليوم وجدت إجابته ..
 اليوم أيقنت أن الله يختار لى الأفضل ..
 وأن مشوار الألف ميل لم يكن لى منذ البدايه .. ولكن
 كان لابد أن أمشيته ..
 كانت كل خطوه فى هذا المشوار ، تعلمنى درساً ما ..
 لكنى وللأسف أيقنت قيمه تلك الدروس بعد فوات الأوان
 ..

كان ببالى دائماً سؤلاً .. يا ترى كيف مرّت عليك كل
 هذه السنوات ؟ .. أعلم أنك قد نسيتينى .. ولكن يا ترى
 هل كان فراقى صعباً .. أم أننى إنتهيت من حياتك فور
 إنفصالنا .. لم أجد يوماً إجابته واليوم لا أريد إجابات ..
 فأياً كانت الإجابته فلن تغير شيئاً من قرارى بأن ترحلى
 عن عقلى إلى الأبد ..

بأن أطرده من قلبى إلى ما لا نهايه ..
 اليوم أيقنت أن هذا القرار جاء متأخراً ..
 لكنى لا أبالى ..
 اليوم على عكس العاده أرى السماء صافيه برغم أنها
 تتلبد بالغيوم ..

وأرى المطر منقذاً ولا أتذكر منه شيئاً كان بيننا فى يوم
ما ..

اليوم إتصلت بنورين .. تلك المرأه التى ظلت تواسينى
طيله السنين الطويله .. والتى تحملت كل لحظات
غضبى وسقمى ومماتى وإدمانى بكِ ..

تلك الحنونه التى شاطرتتى الصداقه بحق .. لتغير
وجهه نظرى فى معنى الصداقه بين رجل وإمرأه .
علمتتى كيف تكون الصداقه التى لا تشوبها الرغبه
علمتتى كيف أواجه مشاكلى وأتغلب عليها ..

فقط أشعر معك بالراحه يا نورين .. أشعر بأننى خلقت
من جديد بين يديك الحنونه .. وأننى لم أكن أعلم شيئاً
عن هذه الدنيا من قبل .. اليوم أخذت قراراً آخر .. قد
تغاضيت فيه النظر عن أنوثتك الملتهبه .. وأناقتك
الملفته للأنظار .. اليوم نظرت إلى داخلك يا نورين ..
لأجد شيئاً أجمل .. قلبك ..

أحزنتى كثيراً عندما رأيت فيه صورتى ولم أكن أعلم ..
عندما رأيت حروف إسمى قد نقشت عليه ولم أنتبه
لذلك قط .. كم كنت أعمى !!

اليوم أعرف أنه كان من المفترض أن يكون هذا

الخطاب لك أنتِ وحدك .. ولكن كان من الملزم أن
تعلمى أن سلمى إنتهت من حياتى ..
طردتها من قلبى لأضعك أنتِ .. يا فاتته لم أرى جمالها
من قبل . ربما لأننى كنت معصوب العينين بحب كاذب
أتذكر يوماً كنت أبكى فأخذتيني إلى حضنك .. كم كان
دافئاً .. كم كان حنوناً .. يومها شعرت بأننى لم
يحتضنى أحد مثلك من قبل .. شعرت بأنك أُمى
وسمعت تنهيداتك ولم أكرث ..
لا أعلم لماذا أشعر بأنى فى حاجه كبيره إلى ذلك
الحضن فى كل يوم .. ربما يمحو لى ألام اليوم كله
..وربما يمحو ألام السنين الطويله ..
لم أكن غافلاً عن نظراتك الراغبه والمتمنيه عندما
ترينى .. لكنى كنت مكبل بأصفاد من فولاذ .. كسرتها
اليوم بإرادتى ..
وجئت إليك راجياً أن تكبلينى بفولاذك أنتِ ..
يا ملكتى ..
أعلم أنكِ تقرأين كل ما أكتبه وأضعه فى الدرج ..

لذا أردت أن تقع عينك على ما سيتلو تلك الكلمة التي
أكتبها الآن ..

تجوزيني يا نورين ??? "

* * *

" هذا خطابي السادس

اليوم الأربعاء .. ٢٠١٣/٥/١

أكتب لك خطابي السادس وأعلم أنك لن تقرأيه كالعاده
.. لكنى أأمل بأن تقرأهم يوم عودتك لى والذى بدأت
أشك بأنه قادم.. طال إنتظارك يا سلمى .. طال أكثر من
اللازم ومازلت أنتظرك ..

أبحث عنك فى كل يوم.. فى كل مكان.. فى كل شئ
ولا أجد سوى ذكريات جمعتنا منذ وقت طويل لكن
أذكرها كأنها حدثت للتو .. متى تعودين ؟

أتذكر يوم قلت لى بأننا سننفضل لكنك ستعودى ..
لكنك لم تقولى متى ستعودين ؟ .. وحشتينى ..

وحشتينى لأبعد الحدود .. كم أشتاق للمساتك
 الناعمه .. ونظراتك الخاطفه .. وحشتنى عيون عشقتها
 فتركتنى .. أمنت بها وأغفلتتى ..
 إعتيت بها وأهدرتتى .. فلما؟؟

اليوم كان صعباً .. تحاوطنى نورين بحنانها المعتاد
 وأتوقع أنها أنتِ .. فلم أجد فى حنانكِ أنتى.
 تلازمنى نورين لكنها تريحنى حقاً وكأن الله بعثها لى
 لتعمل كمُخدر للألمى التى تركتها أنتِ لى ..
 أرى نظراتها لى وأتذكرك أنتِ .. لكن لا تغارى منها..
 فأنتِ تربعتِ على عروش قلبى وحدك ..
 نورين هى خير صديق وقت الضيق .. وأنتِ خير من
 يسبب الضيق ولكن ألام فراقك تلك لذيله ..
 تحرقنى نيران الشوق لكِ .. ولكن أعشقها..
 مثلما أعشقتك .. بل لا أعشق أحداً مثلك ..
 طال الغياب يا سلمى .. طال الغياب كما قالت أنغام ..
 لو تعلمين كيف تمر أعوامى .. أيامى .. دقائقى .. لبيتكِ
 تعلمين ..

اليوم جلست أستمتع لعبد الحليم كعادتى وسمعتة يقول "
 جلست والخوف بعينيها .. تتأمل فنجانى المقلوب ..

قالت يا ولدى لا تحزن .. فالحب عليك هو المكتوب
 "... كم كانت مخطئه تلك المرأه .. فمادام هناك حب
 وجب الحزن ..

كنت أحزن كثيراً عندما نكون سوياً وتفارقيني عند النوم
 ..

كنت أحزن عندما تحزنين .. كنت أحزن عندما أصبح
 غير قادر على إسعادك ..
 وكنت أحزن عندما تتحدثين عن هؤلاء الممثلين الحمقى
 الذين يروقون لكِ ..

والآن يحزننى فراقك .. يقتلنى الشوق كل يوم ..
 تأسرنى الذكريات فى أزقه الحب الضيقه ..
 إلى متى سأنتظرك؟! .. فقط لا أعلم .. ولكن عودى
 لتتيرى ذلك الطريق الذى أظلم من بعدك .. لتضفى على
 حياتى تلك الألوان التى نسيتهها ..
 عودى إلى ليلى لأجد نهارى .. فقط عودى ولن أبالى ..
 أنتظرك كالعاده .. ولا أفعل شئ سوى الإنتظار ..

حبيبك المخلص ... ميلاد ... "

* * *

" هذا خطابى الخامس ..

اليوم الأحد .. ٢٠١٢/٧/١٥

سلمى وحشتينى...

وحشتينى أوى .. ليه سيبانى كده يا سلمى ؟..
لو تشوفى شكلى بقا عامل إزاي .. لو تعرفى قد إيه
مبقتش قادر أتحمل .. صدقيني هيصعب عليكى حالى ..
كثير كنت بقول لِنفسى إن شخصيتى قويه ومينفعش
أضعف ..

كل ده كان قبل ما أحبك .. وبعد ما حبيتك بقيت ضعيف
أوى وبقيت بخاف أوى .. وأكثر حاجه كنت بخاف منها
، حصلت للأسف ..

النهارده عندى ليكى خبر هيفرحك .. أنا إترقيت فى
شغلى وبقيت مساعد تانى وزير الثقافه ..
أتمنى تكونى ناجحه فى شغلك إنتى كمان ..
..ليه فضلتيه عليا يا سلمى ؟..

إيه يعنى كان عنده فلوس كثير و عربيات و عمارات ...
أنا كان عندى حجات أغلى من كده بكتير .. كان عندى
حب وحنان و خوف و إحتواء و تضحيه ..
يا ترى مبسوطه معاه .. يا ترى الفلوس قدرت تشتريك
السعاده اللى كنت أنا بديهاك ..
إيه فايده الفلوس؟! .. إيه فايدتها لما تبقى حزينه ..
مظنش إنك سعيده مع راجل تمنك بسعر زى ما بيتمن
أى حاجه .. كنتى بالنسباله " business " .. صفقه ..
أتمنى تفوقى يا سلمى و ترجعى .. أنا بقا معايا كل
الفلوس اللى كنتى عاوزاها .. وهشتريلك عربيه زى ما
كنتى بتحلمى .. وهعملك أحلى بيت ممكن تعيشى فيه ..
وفوق ده بهديلك قلبى "for free" ..

نورين بتشفق عليا .. بتقول إنى إتجننت .. أصل إمبراح
روح لנحات و إديتله صورتك و هيعملك تمثال هحطه
عندى فى الشقه ..
علشان بتوحشيني أوى .. هيعجبك أكيد ..
فاكره أول هديه جيبتهاك .. فاكره لما قولتلك .. الحب
ميزان .. وكل حبيب بيبقى واقف فى كفه.

..لو الحب زاد فى قلب حد أكثر من حبيبه .. كفته تتقل
..والميزان يميل .. فاكراه ..

يوميها قولتيلي .. الحب مش ميزان يا ميلاد .. الحب
زى الشمس .. بتتورك الطريق اللى بتمشى فيه .. بس
بيجى عليها وقت وبتغيب ..
غيبتي ليه يا شمسي .. يا قمرى .. يا كل حاجه عشقتها
... .. غيبتي ليه ..

يوميها قولتلك .. هو إيه يحصل لو كل الناس قعدت
تترجى الشمس متغيبش ..

بصيتيلي بإستغراب وقولتى .. برضه هتغيب يا
ميلاد .. مهما إترجيناها هتغيب ..

قولتلك : بس بترجع تانى يا سلمى ..
قولتى : بس بتغيب تانى يا ميلاد ..

إنتى بقا يا سلمى الشمس اللى غابت فى يوم ..
ومرجعتش تانى أبداً .. علشان تسيبنى فى عتمه الليل
اللى ملهوش آخر ..

خدتى معاكى الدفا فى عز البرد .. خدتى معاكى الأمان
وراحه البال ..

وسيتيلي الوجد والألم والحسره والحيره وخيبه الأمل

..مبقتش أحس غير معنى الضياع .. مبقتش بشوف
حاجه حلوه من يوم ما بطلت أشوف الدنيا بعينك إنتى
..مبقتش أحس بحاجه حلوه من يوم ما بطلت أحس الدنيا
بقلبك إنتى ..

جوايا كلام مش هيخلص .. بس مقدرش أتجاهله لأنه
ليكى .. هكتبه فى خيالى وأنا معاكى ..
مستنيكى يا حبيبتى .. ولو طال البعاد أكثر..
حبيباك المخلص ... ميلاد ... "

"هذا خطابي الرابع ..

اليوم السبت ٢٠١١/٤/٣٠

بلا مقدمات .. هذا عامى الرابع الذى أشعر فيه

بالهجران ..

اليوم تحديداً قد تشبثت بتلك القشه التى ظننت أنها

ستحمينى من الغرق .. لأجد نفسى أغرق .. وأغرق ..

وأغرق ..

اليوم جائئى أحد الأصدقاء يخبرنى بأنه رآك فى المطار

..

وقع قلبى بين أصابع أقدامى .. ذهبت باحثاً عن إسمك

بين سجلات المسافرين .. وحمداً لله لم أجد إسمك من

ضمنهم ..

لكننى شعرت بألم قاتل عندما رجعت لأعنف ذلك

الصديق فقال لى .. وإيه الفرق يعنى ما هي كده مسافره

وكده مسافره ..

كم كان مؤلماً .. أن أجد السخريه ممن حولى على ما

فعلتیه أنتِ بى ..

خلقتني الله قبلك .. وخلقك لي من ضلع أعوج ..
 وخلق لنا تقاحه لنتشاطرها فنخرج من الجنه ..
 فزيتيها في نظري لأكلها وحدي .. وهكذا فعلت أنا ..
 فطردوني من الجنه ونعمتي أنت بما فيها .. مع إني
 أتشكك بهذا ..
 ظلم الناس إبليس يا سلمى ..
 فلو أن الله لم يخلق ذلك الشيطان .. وخلق لأدم حواء من
 نوعك أنت .. لقمته بذلك الدور الذي قام به إبليس على
 أكمل وجه .. هكذا أعتقد ..
 فنوعك من النساء اللاتي لا يبحثن سوى عن المال
 والجمال والمنصب والجاه والسلطان ..
 نساء خلقت لتطمع فتخسر كل شيء ..
 لم أجد منك يوماً رأياً سديداً بأى شيء .. كنت دائماً
 تتسمين بالسطحيه والتفاهه .. فهمك الأول هو لون
 شعرك وقوه أظافرك الملونه دائماً .. وثيابك الأنيقه التي
 تتبع أحدث صيحات الموضه .. وإن لم تكن هذه
 الموضه تزهو عليك .. فقط ترتديها لأنها موضه ...
 بالإضافة إلى مجلات الجمال .. وبرامج الدايت
 والأكلات الصحيه ..

لم تأت لي يوماً تناقشيني بشئ هام .. بل كنت تتهميني
بأننى رجل عميق أكثر من اللازم ..
ربما رأيتنى كذلك لأنك كنتِ سطحيه أكثر من اللازم

..

لا أعلم لماذا عشقتك بكل هذه السطحيه التى تمتلكك ..
عشقت تقاهاتك وألوانك الزاهيه ..
عشقتك لأجد قلبى معلقاً بين السماء والأرض .. فلا
لامست يدي النجوم .. ولا ذاقت قدمى طعم التراب ..
فقط لا أجد نفسى سوى بأشعارى ..
بالمناسبه نورين معجبه بأشعارى جداً وخصوصاً
الأغنيه اللى كتبتها لك إمبراح .. إسمعيها وقوليلى رأيك
فيها ..

((إبتلانى ربنا بـُحبك ... منا بـُحبك ..

وهعمل إيه ..

مفيش فى إديا شئ تانى .. وعارفانى ..

فهكذب ليه ...

أيام بتفوت وبتعدى.... وأنا لسا على وعدى

وإنتى هاجرته كل طريق ..

وكل طريق مشيت أنا فيه ...
 أكيد البُعد قساكى .. و عارفه إنى بهواكى ..
 قوليلى يا اللى نسيانى ..
 إمتى هقدر أنساكى
 أكيد خدتى على بُعدى .. لكنى تعبت من بُعدك
 ولو ناسيه حروف وعدى
 أنا فاكر حروف وعدك ..
 قلبك اللى سابنى وباع .. قوليله أنا لسا مستتية إبتلانى
 ربنا بُحبك .. منا بحبك .. وهعمل إيه ..))
 حبيبك المخلص ... ميلاد ... "

" هذا خطابى الثالث ..

اليوم الأحد .. ٢٠١٠/٣/١٤

بعد خطابى الأخير لك أيقنت بأنك لن تتغيرى ..
هكذا مرّ عام كامل .. أطمح بأن تمس كلماتى قلبك
الجاحد .. أتمنى لو أننى أستطيع فتح قلبك لأنتزع كل
تلك القسوه التى تكمن بداخله ..
وأضع مكانها حبى وقُبلاتى ..
اليوم كعادتنا نحن على خصومه جديده .. ربما كان
شجارنا البارحه أشد وطئاً من كل مرّه ..
لكنى أعلم أننا سنعود كالعاده .. لا أعرف لما نتشاجر ..
تقولين دائماً بأنك تحبيننى .. وأنا أزعم أنك تكذبين ..
فما تعرفينه عن الحب ما هى إلا معلومات سطحيه مثلك
..
تتهمينى دائماً بأننى رجل أعيش فى زمن غير زمنى ..
ربما سمعت إِدعائك ذات مرّه بأننى من زمن عبد الحليم
حافظ .. كنت دائماً بنظرك رجل قديم الطراز والأفكار
.. لا يواكب العصر ولا يستخدم التكنولوجيا ..

وتدافعين عن نفسك بسذاجه بأنك كمثل باقى فتيات
عصرك .. تهتمون بالمكياج الصارخ والألوان الزاهيه
والملابس الضيقه للفت نظر الرجال السطحين مثلكن ..
لم أكن أبداً سطحياً يا سلمى ولم أنتبه يوماً إلى ما ترتديه
.. أو ما تلطخين به وجهك .. لكنى لا بد أن أعترف بأنك
أفضل من تلطخ وجهها الجميل ..

لا أعرف لماذا بدأت ألوانك ورونقك البراق خطف
أنظارى اللامباليه ..

ربما تمنيت يوماً أن تدخلى عقلى فتعرفين كيف تتكون
تروسه .. كلاسيكياته تلك أعشقها ..

أعشق القراءه لمصطفى المنفلوطى ونجيب محفوظ
والرافعى ومصطفى محمود..

أعشق موسيقى فيروز وأغانى أم كلثوم وصوت عبد
الحليم ..

أعشق أفلام عمر الشريف وفاتن حمامه وسعاد حسنى
وأنور وجدى

أعشق ألحان بليغ حمدى وموسيقى عمر خيرت ..
أما أنتِ فتنظرين لهم بأنهم أجيال تهالكت ..
غطت أسمائهم الأتربه لتمحوا ما فعلوه ..

أخذوا زمانهم ورحلوا إلى الأبد ..
 تعتقدين أنت أن موسيقى الجاز تلك ستروق لى .. كم
 أكره الضوضاء التى تصدر من سماعات أذنك عندما
 تستمعين لموسيقى الروك ... تحبين الدرامز ذو
 الأصوات الصاخبه وأحب أنا الناي ذو الموسيقى الهادئه
 ..

تحبين أغانى الراب ذو الريتم السريع والتى تكادين لا
 تفهمين من كلماتها شئ .. وأحب أنا أم كلثوم عندما تعيد
 كوليهاتها مراراً وتكراراً...
 برغم كل ذلك أتواصل مع عالمى يا سلمى ..
 .. لكنى أرى به الكثير من السلبيات ..

أتواصل مع المطربين بأشعارى والتى تتسم بمود
 العصر .. كلمات العصر .. ألعانه ..
 ربما تنظرين إلى ما لا يعجبك داخلى .. وتتجاهلين كل
 ما هو إيجابى ..
 أما أنا فأنظر إلى كل ما بداخلك من جمال .. بما فيه
 سلبياتك التى أعشقها ..
 لا أعرف كيف وصل بى الحال إلى تلك المرحلة

المتأخره من مراحل العشق .. أدمنتكِ وأصبحت لا
أقدر على هجرانك .. فلا داعى لأن تستمر الخصومه
أكثر من ذلك ..

فى تمام الساعه الثالثه عصراً .. ستسمعين بابكِ يطرق
.. وستجدين تلك الورقه أمامه .. لعل حروفها تنسيكى
ما قد سلف منى بالأمس ..
أسف يا حبيبتى ...

" ... ميلاد ... "

* * *

" هذا خطابى الثانى "

اليوم السبت .. ٢٠٠٩/٢/١٤
كل عام وأنتِ حبيبتي .. أتمناها من الله كل يوم ..
حتى أموت .. أو يموت الحب ..
هذا عامنا الثالث معاً .. والقالتين الرابع ..
مرت أربعه أعوام أعرفك فيها ولم أشعر بهم أبداً .. لم
أشعر وكأن أحدهم إختلسهم من عمري سهواً
أحبك يا سلمى وكأني لا أرى في هذه الدنيا سواك
أعشق تفاصيلك .. قامتك المتوسطه ورشاقه خصرك ..
أعشق عيناكى كل العشق .. فقط أراهم وأسبح فى
دومات عشق لا تنتهى ..
أعشق شفاهكِ عندما تتحدثين أو تصمتين ..
وأعشق أكثر ما بداخلك من حنان ورقه ونعومه ..
أعشق كل ما فيك .. وأحبك بكل ما في ..
لكن أغضب كثيراً عندما تقفين مع وائل بالكلية ..
ذلك الغنى .. كم تقتلنى نظراته المتفحصه لكِ ..
وكم يؤلمنى ذلك البريق الذى أراه فى عيناكى عندما
تكونين معه ..
تعلمين وجهه نظرى الصارمه فى نظريه الصداقه بين
الرجل والمرأه ..

فلا صداقه بين رجل وإمرأه لا تجمعها قواعد الرغبه ..
أو مشاعر من نوع ما ..

لا صداقه بريئه تجمع رجل وإمرأه يا سلمى ..
فكيف تضع مغناطيس ذو قطب شمالي .. فى مواجهه
مغناطيس ذو قطب جنوبى .. وتريد منهم ألا يتجاذبان ..
كيف !!؟ ..

أصبحت أخاف كثيراً من يوم أخشى قدومه ..
لا تفعلنى .. وأعدك بأنك لى حتى الموت ..
لكننى أخاف .. أخاف أكثر من اللازم ..
كنت أجلس البارحه أشكو للقمر ما بى عندما أشعر
لسانى فجأه ..

((...بخاف لعنيكى ماتشوفنيش..
بخاف أمشى ومنتدهنيش..
بخاف لو قولت وحشانى ..

تتغرى ..

فمئرديش..

بخاف أقرب ... بخاف أبعد

بخاف أهرب ... بخاف أوعد

بخاف لتعيشى مع غيرى
وأرجع تانى وحدى أعيش..

إحساس الخوف بقا أسيرى ..
ملازمنى فى تفكيرى
أنا نفسى أسأل ليه ... بخاف ...
وإنتى مبتخافيش...))

ليه بخاف وإنتى مبتخافيش يا سلمى؟؟..ليه!؟

... ميلاد ... "

* * *

" هذا الخطاب ألجأ له بعدما فاض بى ..

اليوم الجمعة .. ٢٠٠٨/٢/٨

اليوم قد أهلكنى البحث فى طياتك الداخليه وممراتك
العاطفيه ..

أنتشل نفسى بصعوبه فائقه من حطام معركة خسرتها
بجداره .. لم يكن ذلك لأنى مقاتل سئ
بل كان لأنك أنت كنتِ ذلك الخصم المغوار ..
اليوم أسير كفارس مهزوم .. راقى له فكره الإستسلام
والرضا بالذل والمهانه ..
كانت أرض المعركة قاسيه .. فكان الحب يغطيها من
وجهة نظرى .. الحب الذى منعى من قتلك فى مرّات
عديده سنحت لى الفرصه بشده ..
وسمح لكِ بقتلى فى أولى فرصك للإيقاع بى ..
..فتبأ له ..

أستسلم لكِ الآن بكل ما فى من تعب أنهكنى وقضى
على أمالى العريضه ..
برغم كل ذلك أنوى الإستمرار بما قد بدأته ولا أعلم ما
السبب ..

فهناك آلاف الأسباب التي تحتنى على أن أرحل عنك
ولا أفعل ..

أنتسبت بحبال واهيه تربطنى بك .. أعلم بأنه من
المفترض أن أكون أنا الجزئ الصلب فى العلاقه .
الجزئ الأقوى والذى يتحمل الصدمات ويلين المشقات
ويتخطى الصعوبات ..

.. لكن هذا ما يعلمه الجاهل بالحب ..
فعندما يعشق رجل إمراه لا تحبه .. يفقد مفاتيح التحكم
وقدرته على السيطرة عليها أو حتى على مشاعره
نحوها ..

وعندما يعشق رجل أنثى تطغو أنوثتها فى كل يوم أكثر
.. فيزداد ضعفه أمام جموع قواها أكثر ..
.. فلا يكبل أنوثه مرأه سوى قلبها ..
وأنت لم تعطينى قلبك قط .. هكذا أشعر وهكذا يأتى
إنكارك المُلح ..

طالما كان لك إهتمامات تتعارض مع إهتماماتى ..
طالما كنت أنا شيئاً مختلفاً وأردت أنثى مختلفه مثلى ..
وكنت أنتِ كباقى النساء التقليديات .. اللاتى لا يتميزون
سوى بألوان الميك أب .. وتدرج الأنوثه بينهن ..

كم أكره كل ما هو تقليدى ..
 اليوم لا أعرف ماذا أريد .. لأول مرّه أصبح بلا
 هدف .. وبلا وجهه ..
 أتمنى من أعماق قلبى أن يهديك الله إليّ ..
 إلى أن تشعري بما أنا فيه من عشق لا ينتهى منذ قابلتك
 فى ذلك اليوم الذى إعتبرته يوماً فاصلاً فى حياتى ..
 يوماً كنت كمن لم يرى النور قط.. أنتذكريه ؟
 يوم كنتِ تسيرى وأسير بجوارك ولا أعرفك ..
 إقتنيتى الأتوبيس وهكذا فعلت أنا بالصدفه البخته .
 وعندما سعدت لم أجد مكاناً خالياً سوى بجانبك ..
 أخرجت إحدى أوراقى وقلمى وأخذت أفكر فى كلمات
 تكمل ما قد بدأت من شعر ..
 وإذ بكلماتى تخطف بصرك ..
 قرأتها لتحرك شئ ما بداخلك ..
 سمعت صوتك لأول مرّه .. إنت اللى كاتب الكلام ده
 ؟ .. لأجيبك .. أيوه أنا .. عجبك ؟
 عجبنى أوى .. قلتيها وأخذتى الورقه وتفحصتى كلماتى
 بدقه أكثر فأحسست أنها لمست قلبك على الفور ..
 قلتنى : إحساسك مرهف

فقلت : شكراً لزوفك

فقلتى : مش مجامله .. إسمك إيه ؟

فقلت : ميلاد .. أتذكر كم أعجبك إسمى وكم راق
لى إسمك ..

وبعدها عرفت أنك بكليه فنون جميله فحولت إلى نفس
الكليه .. وبدأت حكايتنا .. كانت هذه لحظه ميلاد.. يا
سلمى

كانت كلماتى تلك أتتذكريها ؟ ..

كم أعشقتك ولاأبالى ..

وكم تسكنين قلبى وروحى وبالى ..

وكم بت أشكو طول الليالى ..

وكم كنت فظاً غليظ السؤال ..

وكم كنت شيناً رقيق الخصال ..

فكم أعشقتك ..

كم أعشقتك يا سلمى

لكن أرجوك لا تكونى تقليديه ..

... ميلاد...."

التابوت الرابع

كش ملك

لم تكن تعلم لماذا لم تعطى نفسها فرصه لتقديم بعض
التنازلات ...
أمسكت بهاتفها المحمول وظلت تقرأ تلك الرساله
كانت آخر رساله تصلها منه ..
تأملت ذلك الرقم التى حفظته مؤخراً ..
جال بخاطرها أن تتصل به .. ربما ينتظر مكالمتها
.. كما تنتظر هى أن يضىء رقمه شاشتها بأى وقت ..
ضغطت على زر الإتصال .. لكنها سريعاً ما ضغطت
على آخر لتجهض مكالمه لم يكتب لها الله أن تتم ..
كانت تدرك أن الوقت بات متأخراً .. لم يصبح تقديم
التنازلات أمراً مقبولاً .. والأصعب هو كيفية خلق
أعذار جديده .. أدركت قيمه ذلك الإنسان الذى كانت
تملك قلبه يوماً ما .. وظلت تتسائل .. أكنت بهذا الغباء
؟ .. أكنت كما قال ..

لا أرى سوى تحت قدمای؟...حقاً كنت لا أرى ..
 كانت تعلم أن رجوعه لها من رابع المستحيلات
 فتلك الحكايات التي تنتهى بطريق مسدود .. لم تخلق
 للعبور منها .. فقط لا تسمح لك سوى بالرجوع حيث
 جنّت ..

قرأت الرسالة مرّه أخرى .. كانت هذه المرّه العشرين
 لهذا اليوم .. باتت تحفظ حروفها .. تدرك معانيها ..
 تتحسس أسلوبه المُسجع فيها .. إحساسه المُرهف ..
 تتخيل تعابير وجهه الكاشره لو أنه قالها لها وجهاً لوجه
 ... ليته فعل .. هكذا تمنّت ..

ليته لم يقرر أن يذهب دون حتى لقاء تودعه فيه ..
 تتذكره أبد الدهر .. وتقصه لأولادها على صوره حدوته
 قبل النوم ..

ليته أعطاها فرصه أخيره .. أو ربما أعطاها الكثير من
 الفرص التي أهدرتها هبائاً .. كم كنت غيبه !!! تلك
 الجملة التي لا تفارقها .. بالإضافة إلى ذلك السؤال
 المرعب..يا ترى هل وجد بديلاً ؟

هل أصبحت صفحه مطويه فى سجلات حياته ؟
 هل أصبحت قصه عابره .. إنتهت لتبدأ غيرها ؟

لم تجد يوماً إجابته .. ربما كان هذا يريحها قليلاً .. فماذا لو علمت أن الإجابة على تلك الأسئلة كانت بالإيجاب؟ ..

ماذا لو علمت أنها لم تبت سوى نكرى ..
 لكنها لم تستطع منع عقلها من التمنى ..
 أن تبحث عن إجاباتها لتجدها .. كلا ..
 ليت المطالب بالتمنى .. توقن بهذه الجملة ..
 فعندما تجد نفسك قد حُبست بخانه الـ"يك" .. أو فجأه
 تسمع أحدهم يقول "كش ملك" .. حينها ربما يعلنوك
 خاسراً باللعبه .. كذلك الحب ..
 هكذا شعرت هي .. بأنها كانت تلعب بالشطرنج ..
 تحرك ما تريده من القطع .. وكله ينصب فى النهايه
 لخدمه الملك .. لتكتشف أنها أصبحت مجبره على
 تحريكه عند الـ"كش" .. فتمسك بملكها المعظم .. ولا
 تجد مكاناً يحتويه .. فقط أصبح عاجزاً عن الحركة
 .. ولا أحد من رجاله المخلصين أصبح قادراً على
 حمايته .. ليعلم خصمها أن ملكها قد مات ..
 ليتها لم تلعب بالشطرنج ...
 كانت تقرأ الرساله مرّه أخرى .. تلك الرساله التى

أهلكتها قراءه .. للتذكر مجدداً .. كم كنت غيبه !

* * *

كان أول يوم لها بالكليه عندما رأته .. لا تعلم ماذا
جذبها نحوه دوناً عن غيره .. لم تهتم .. هكذا ظل الحال
ليمر ترمها الأول ..

لا تعلم أمن المفترض على طالبه بكليه الطب ألا ترى
سوى تلك الكتب العلميه الضخمه .. أم من الطبيعى أن
يدق قلب طبيبه لم تتعلم كثيراً عن الطب بعد ..
فهى لا تعرف كثيراً عن هذا الشئ الذى تحاكت به كثير
من الأفلام .. وتغنت به معظم الأغانى ..
وتناولته العديد من الروايات التى تقرأها
.. الحب ..

لم تذوق طعمه قط .. ولم تجربه يوماً .. فهى لم تكن سوى
ساره الطالبه المجتهده .. التى لا تضيع وقتها إلا بشئ
تعرفه .. تعايشت كثيراً بين الكتب
هى فقط ترى أن الكتاب خير صديق .. فدائماً ما تجلس
حول كتبها المبعثره .. بعضها كان علمياً بحتاً .. ولا
مانع ببعض الروايات المثيره .. التى تهرب بين

صفحاتها لتنتقل إلى عالم آخر .. تعيش أحداثه عبر
كلماته المكتوبه .. وتنسى الواقع بمن فيه .. كانت تفضل
الروايات الرومانسيه .. التي تنتهى نهايات سعيده ..
لكنها كانت تمل نهايتها التقليديه المعروفه ..
تعلمت الشطرنج فى سن العاشره .. كانت تعرف بالكاد
كيف تحرك كل قطعه .. كان أباهما هو من يقوم بدور
المعلم .. فهو يعشق تلك اللعبه .. ويوقن أنها ستساعد
فى تنميه القدرات العقليه لفتاته الصغيره .. توارثت
عشق هذه اللعبه من والدها .. لم تغلبه قط .. حتى عندما
أصبحت ذو الثامنه عشر عمراً .. عندما أتت إليه تحمل
تلك القطعه الخشبيه المربعه والتي تتكون من أربعه
وستون مربعاً صغيراً يتلونون باللونى الأبيض والأسود
على التبادل ..
وضعتها أمامه .. ونظرت له قائلةً : مش عاوز تلعب
يمكن تعرف تغلبنى ..
— هههههه مش مكسوفه من نفسك وإنتى بتقوليهما
..لالالا مليش مزاج النهارده ..
— وإنى مش مكسوف من نفسك وإنى خايف تلاعب
واحدده قد عيالك ..

— ههههه بقا كده .. طب يلا ..
 وضعت المربع الخشبي على الطاولة وأخذت تضع
 القطع في وضعها المتراص .. وبدأت في التفكير بخطه
 ما لهزم ذلك الرجل الشائب ..
 مرت نصف ساعه في صمت وتركيز .. حتى قطع
 صوته الصمت : عامله إيه في المذاكره ؟
 — كويسه ..
 — أنا عارف إنك شاطره .. بس عاوز أفنخر بيكي قدام
 الناس .. وأقولهم بنتي دوكتوره..
 — إن شاء الله ..
 — مدرس الأحياء زعلان منك .. بيقول جبتي درجه
 وحشه في الإمتحان اللي فات
 — أصل الإمتحان كان مفاجئ .. وبعدين أنا نقصت ثلث
 درجات بس ..
 — اللي عاوز يخش كليه الطب .. بالنسباله التلت
 درجات دول ثلاثين درجه ..
 — عادى بقا يا بابا .. ما أنا لو كنت عارفه إن في
 إمتحان كنت قفلته ..
 — وحتى لو مش عارفه لازم تبقى جاهزه دائماً ..

متخليش المفاجأه تخسر ك حاجه .. خلى دايماً المفاجأه
متوقعه ..

— كِش ملك .. ومات الملك .. هاهاهاهها بزمك المفجأه
دى كنت تتوقعها ..

نظر إلى تلك القطع التى حاوطت ملكه .. لم يتوقع أنها
ستهزمه : موتيه بايه ؟

— بالحصان ...

— الحصان إبن الكلب ده مأخذتش بالى منه ..

— لا يا بابا لازم تاخد بالك من كل حاجه .. علشان

متفاجأش .. خلى دايماً المفاجأه متوقعه يا بابا ..

— نفسى أعرف جاييه اللماضه دى منين .. العبى تانى

..

— لالا لا إنت خلاص مبقتش من مستوايا ..

كانت هذه أول مرّه تهزمه فيها .. ولم تكن الأخيره ..

فقد شهرت بين زملائها بأنها أفضل من يلعب شطرنج

بدفعتهم ..

كان ذلك الإعتقاد قائماً حتى ذلك اليوم التى كانت تجلس

فيه بالكلية .. وقد أعدوا مسابقه للشطرنج على مستوى

كل الدفعات ..

كانت قواعد المسابقه .. أن من يفوز بعشره أدوار
متتاليه يفوز بالمسابقه ...

تجمعوا حول تلك الطاولة وبدأت المسابقه ..

أخذوا يتناوبوا فى الأدوار .. منهم من كان يفوز بدورين
.. وآخر بأربعة .. حتى كان ذلك الشاب الذى لم يُهزم
لثمانيه أدوار متتاليه ..

جلست هى أمامه .. كان هذا الدور التاسع له .. والأول
لها ..

طال الدور ليعلن إنتهاء سلسله الإنتصارات الأطول
حتى الآن .. لم يصدق أنها هزمته بهذا الأسلوب
المميز .. لتبدأ سلسله إنتصارات جديده ..

كانت تهزمهم الدور تلو الدور .. بأسلوب مميز ..
وحرركات قاتله .. تزايدت الأعداد المتفرجه ..

وهى تنهى دورها التاسع بحركه قاتله جديده ..
نظروا لها فى تعجب .. ونظرت لهم فى ثقه ..

حتى جلس هو على الكرسي المقابل .. كانت أول مرّه
تراه عن قُرب ..

نظر لها بأعين مهزوزه قليلاً .. ونظرت له بأعين واثقه
من النصر ..

بدأ هو اللعب بذلك العسكرى محدود الحركة ..
وبدأت هى بحصانها الرّماح .. الذى لا توقفه أى
حواجز أو عراقيل ..

إستغرق الدور قرابه الساعه بينما كانت تنظر له وهو
يفكر .. كم يبدووا وسيماً ..

— كِش ومات .. قالها هو بثقه كان يخفيها
لنتعالى أنفاس المتفرجين شاهقةً .. وتتنظر هى على
الطاولة فى ذهول : موته بايه ؟
— بالحصان ...

كانت تظن أنها فقط من تمتلك حصاناً جسوراً ..
قضى هو على سلسله إنتصاراتها والتي كادت أن تنتهيها
بالفوز الأخير ... عندما سمعت صوته : " hard
luck" ..

— هو فين الـ "luck" ده .. تغلبنى على آخر دور
حرام عليك ..

— وإنتى مش حرام عليكى لما تغلبنى تسعه ورا بعض
.. بس بصراحه إستمتعت باللعب معاكى .. أسلوبك
مميز .. وبتحبى تلعبى بالحصان زىي ..

— هههههه أيوه .. بحب الحصان علشان مفيش حاجه
بتقدر تحجم حركته .. وببيقا ماسك تمن خانات وحركاته
غير متوقعه ...

— بالزبط ... بتلعبى شطرنج من إمتى ؟

— من حوالى تسع سنين .. وإنت ؟

— من خمس سنين ..

— بس خلى فى علمك .. هيجى يوم وهغلبك جامد أوى

..

— ههههه ده شئ طبيعى .. محدش فينا بيفضل يكسب
دايماً ولا بيخسر دايماً ..

— إنت فى سنه كام .. ؟

— أنا فى سنه تالته .. وإسمى مُهاب .. وإنتى ؟

— أنا ساره ... لسا فى أولى ..

— طيب أنا عندى محاضره دلوقت .. بس أكيد هشوفك

تانى ..

— إن شاء الله .. قالتها بينما تركها ذاهباً نحو الدرج ..

ظلت تراقبه .. وفجأه إلتفت للوراء ناظراً لها .. لتبعد

عيناها فى حركه تلقائيه .. إبتسم بهدوء .. ثم إختفى ..

* * *

كانت بغرقتها عندما أخذتها أقدامها نحو دولاها فتحتة..
وأخرجت منه قطع الشطرنج التي تعودا على اللعب بها
.. أخذت تتأملهم .. كان يمسك بهم يوماً.. أمسكت
الحصان .. إنها القطعه المميزه بالنسبه لهم .. جاء
بعقلها شئى ما .. ماذا لو أصبح هذا الحصان حقيقياً ..
وأتى هو ليعتليه وتركب هى ورائه .. وينطلقا به بين
خانات الشطرنج..

كان هذا المشهد تأليف طبيعتها الرومانسيه وإخراج
إشتياقها اللاذع..

ليت الزمان يعود يوماً .. تمننتها من قلبها .. لتستأصل
كل شئ يشوب علاقتهما المنهاره ..
تقول لنفسها كثيراً .. ما فائده الطب ؟! .. حقاً سقم الجسد
مؤلم .. لكن سقم الروح أكثر ألماً ..
ألام الروح تلك مميته .. ولا يوجد لها علاج وهذا
الأسوء ..

فكرت بهذا الحل الوحيد الذى يعمل كمُسكن للروح ..
الصلاه..
تصلى وتدعو ربما يستجيب لها من قدر لها هذا المصير
..فهو فقط .. بيده مفاتيح القلوب المغلقه..

هكذا تقضى يومها .. ما بين النوم العميق.. والتفكير
الطويل .. والبكاء المُلح .. فتذهب وتصلى فتجد بعضاً
من السكينه التى تودعها إلى سريرها مجدداً ..
وأصبحت المذاكره شيئاً ما على الهامش ..

* * *

كان هو ينظر إلى ذلك الدخان الذى يخرج من
سيجارتته .. يتمنى لو أنه يتبخر مثل ذلك الدخان الذى
يحسده على أنه ما أن يتكون حتى يتلاشى سريعاً ..
الإشتياق .. كم هو مؤلم .. كم يشنق لها ..
كم يشنق بأن يراها وهى تفكر بخطه لتهممه .. وكم
يتذكر كيف إنتهى بهم الحال .. وكيف تعطلت السفينه
فى وسط المحيط ...
لم يكن وحده بالغرفه .. كان معه لوى يشاركه جروحه
العميقه ويذكره بالأم الماضى " إفتكر دلوقت بس ..
إبتدى يفهم يحس .. لما ضعت أنا من إيديه .. سمى
شوقى وحبى ضعف .. كل كلمه وكل حرف .. قالها
قلبى خساره فيه " ...
الخساره .. كم كانت هزيمته منها ثقيله .. كان هو دائماً
يغلبها بأدوار الشطرنج .. ليكتشف فى النهايه أنها هى

من إنتصرت فى دور كبير لم يكن يعرف أنه جزئ منه
 .. جزئ من لعبه كبيره أنهتها أيدى محترفه .. بحركات
 لولايه تتلوها طعنات قاتله .. كان مجرد قطعه تحركها
 كيف تشاء .. وهو أبله يظن أنه يمتلك زمام الأمور ..
 تذكر عندما قالت له ذات مرّه " هيجى يوم وهغلبك
 جامد أوى " .. يتذكرها لتلمع عيناه .. وتغضب أقدامه
 راكلةً أى شئ يقف فى طريقها .. ويفتح باب غرفته
 خارجاً لا يعلم إلى أين .. ولا يعلم متى ستختفى هى عن
 أنظاره .. أو متى سيختفى هو عن أنظار نفسه ..

* * *

كانت تجلس وحدها بكافتريا الكليه .. عندما سمعت
 صوت بجانبها : إزيك ؟
 نظرت إلى مصدر الصوت فوجدته هو .. كانت تشعر
 أنها ستقابلة اليوم تحديداً .. لكنها تفاجئت به حينما وقفت
 تسلم عليه : الحمد لله .. إزيك ؟
 — كلو تمام .. ممكن أقعد ؟
 — أه طبعاً إتفضل ..
 — عامله إيه فى المذاكره بقا ؟
 — الحمد لله بذاكر كويس .. بس مش فاهمه

"histology" ..

— ليه كده ؟

— مش عارفه كل ما أذاكرها أنساها .. وكمان الدكاتره
بيشرحوا بسرعه فلقيت عليا كم كبير مش عارفه أذاكره
إزاي ..

— ولا يهملك أنا ممكن أشرحها لك لو تحبى ..

— بجد !... بس مش عاوزه أعطلك عن مذاكرتك

— لا خالص .. أنا منظم وقتى .. تحبى نبدأ إمتى ؟

— مش عارفه .. شوف إنت فاضى إمتى ..

— أنا فاضى فى أى وقت .. إيه رأيك يوم الإثنين فى
المكتبه الساعه إتناشر ..

— مممم أوكى ..

— قوليلى بقا غلبتى مين تانى فى الشطرنج ..

— هههههه فريد ..

— مين فريد ؟

— بابايا ..

— هو بباكى بيلعب شطرنج ؟

— من زماااااااا .. هو اللى علمنى ألعبها أصلاً .. وهو

اللى حببني فيها ..

— يا بختك أنا مش بلاقى حد الأعبه عندى فى البيت ..
 — خلاص إستلف بابا خميس وجمعه .. ورجعهولى
 باقى الأسبوع ..

— هههههه طيب مش لما أتعرف عليه الأول .. يمكن
 ميرضاش بحكايه خميس وجمعه دى ..

— هههههه لا عادى بابا إيزى خالص .. وإجتماعى
 ويحب يتعرف على ناس جديده .. بس هيزلك لو غلبك
 فى الشطرنج ..

— أنا كده إبتديت أخاف منه ..

— لا متقلقش أنا ممكن أقتلك تغلبه إزاي ..

— إزاي ؟

— أصل فريد بيحب يلعب بالوزير والفيل .. لو قفلات
 عليه بالعساكر ودخلت عليه بالحصان ممكن تغلبه ..
 بس لو معرفتش تقفل عليه .. إنسى يا معلم ..

— شوقتينى الأعبه ..

— بلاااش

— لا عادى حتى لو خسرت مش مهم ..

— إفتكر إن أنا قولتلك بلااااش

ضحك هو على كلماتها .. بينما كانت هى تخشى أن

تذهب إلى ذلك العالم .. عالم الحب .. لا تعرف لماذا
تخاف منه .. ربما لأنه مثل البحر .. يسحبك بهدوء ..
وتتلاشى رماله الناعمة من تحتك بالتدريج .. لتجد
نفسك فجأة قد أصبحت في عرض البحر

* * *

فريد .. إنت فين ؟ .. قالتها ليرد هو بسرعه : أنا هنا يا
حبيبتى تعالى ..

إستطاعت تحديد مكانه بسهولة فذهبت له وقبلته ثم
أردفت : بابتى .. فى واحد زميلى فى الكليه واقف بره
وعاوز يتعرف عليك ..

— وموقفاه بره ليه ؟ .. إندهيله ..

— ذهبت ولم تتأخر وعادت بخطوات واثقه وكان هو
ورائها بخطوات متوتره ..

— بابا ده زميلى مهاب فى تالته طب .. ده بابا وبقوله
يا فريد .. وكثير بدلعه وأقوله يا فيرى .. وهو مش بيحبه
وبيقولى أنا مش الأقوى على إزاله الدهون .. أصل
فيرى دمه خفيف .. طالعى كده ..

— ههههه إتشرفت بحضرتك جداً يا فندم .. قالها مهاب
وجلاً عندما نظرت له ساره تحته على نزع الألقاب ..

- إتفضل أقعد يا مهاب .. وبلاش يا فندم دى .. قولى
 زى ما بتقولى ساره .. فرید..
- قصدك فيرى .. كانت هذه ساره..
- ههههه لا كده ولا كده سامحونى مثل هعرف ..
- لو لينا نصيب نتقابل تانى هنتعود ..
- إن شاء الله يا فندم
- بص يا فيرى.. مهاب كان هيشرحلى حجات فى
 مكتبة الكليه زى ما قولتلك ، بس أنا قولتله يشرحلى هنا
 أحسن .. وخصوصاً إنه عاوز يتعرف عليك لما عرف
 إنك جامد فى الشطرنج زى بنتك كده بالزبط ..
- بتعرف تلعب شطرنج ؟ .. قالها فرید موجهاً حديثه
 إلى مهاب الذى كان يجلس منكمشاً : أيوه
- بتلعب من إمتى ؟
- من خمس سنين كده
- مين علمك الشطرنج ؟
- ماما الله يرحمها .. كانت بتحب اللعبه دى أوى
- الله يرحمها .. البقاء لله ..
- ونعم بالله ..
- لاعبت ساره قبل كده ؟

- و غلبنى كمان يا فيرى..
- طب هاتى الشطرنج وإعملى لمهاب حاجه يشربها ..سمعتها وإنصرفت ولم تتأخر كثيراً حتى عادت تحمل
ثلاثه أكواب من العصير والشطرنج...
سيجاره ؟؟.. قالها فريد مقدماً عليه سجائره إلى مهاب
الذى رفض : لا شكراً مش بدخن
— مش بتدخن ولا مكسوف منى .. لو مكسوف خليك
على راحتك عادى
— لا حقيقى مش بدخن
— أحسن حاجه .. أوعى تدخن
— لا متقلقش مش بحب ريحتها أصلاً..
— يبقى هتدخن فى يوم من الأيام
— ليه ؟
— كش ملك ...
— ملوش حركه ؟
— لأ ليه ... هنا .. قالها مشاوراً على إحدى الخانات ..
بينما نظر مهاب إلى ساره التى تجلس هائمه .. لا يعلم
بماذا تفكر ..
— كده بقا كش ومات .. كان هذا فريد

أفاقت هي على صوت أبيها : غلبك .. مش قولتلك لو
معرفةتش تقفل عليه .. إنسى ..

— عادي يا ولاد .. أنا هقوم أسمع ماتش مانشيستر
سيتي وتشيلسي حد هيسمعه معايا ؟

لم يتلقى أي رد فأردف : طب أنا جوه لو إحتاجتوا
حاجه ..

نظر لها مهاب متسائلاً : كنتي سرحانه في إيه ؟ ..
نظرت له .. وكأنها تجيب بنظرتها .. نافيةً بلسانها :
أكيد مش سرحانه فيك يعني ..

أعجبه تلقائيتها فمازحها : إيه الصراحه دي .. طب
إخدعيني .. إكدي عليا ..

— ههههه لأ ..

— بباكي لطيف أوى .. بحس إنه راجل چينتل ..

— ميرسي .. أنا بحبه أوى وهو حنين عليا أوى .. غير
أي أب عادي حنين على ولاده .. أنا بحس مع فريد ..
إنه بابايا وحببيي وأمي الله يرحمها .. بالمناسبه .. إنت
مقولتليش قبل كده إن ممتك متوفيه

.. أشاح وجهه بعيداً .. وكأنه تذكر شئ مؤلم ..
أردفت هي بعد صمته الغير متوقع : أنا أسفه !

نظر لها نظره تعنى بأن ما تذكره الآن لا يمحوه الأسف .. للأسف ..

فأردفت ثانيةً : قد كده كنت مرتبط بممتهك! .. أنا بجد أسفه ..

وجه نظره ثاقبه مباشره لتخترق قرنيه عينها وتتجه نحو قلبها لتتوغله .. ثم أطلق رصاصه بلسانه : أنا هقولك سر .. إنتى أول واحده أقوله ليها.. بس توعدينى يفضل سر بينا ..

لم تتردد لحظه : أوعدك ..

فأكمل : أنا أمى لسا عايشه ..

إتسعت حدقه عيناها فى دهشه كبيره وعلامه إستفهام رسمت على جبينها : أمال بتقول عليها ميته ليه ؟؟ .. نظر بعيداً إلى شئ بعيد يكاد لا يراه ثم أجاب : علشان هي ميته فعلاً ..

— أنا مش فاهمه حاجه ..

أتى بنظراته من بعيد ليوجهها نحوها مرّه أخرى : تفرق

معاكى تعرفى بقول كده ليه ؟

— أيوه تفرق .. تفرق كثير ..

— تفرق فى إيه ؟...

— أصل مفيش حد بيقول كده على أمه غير لو كان فى
سبب قوى .. غير كده تبقى قله أدب .. وعلشان أنا
عارفه إنك مش قليل الأدب فقولى إيه أسبابك؟؟
نظر لها بإعجاب واضح : تعرفى إن ساعات بحسك زى
أمى ...

أجابت هى بنديه : يعنى بتحسنى ميته ؟

— لأ .. بس بحس إنك لسا مموتيش ..

— فهمنى قصدك .. وجاوب على سؤالى ومتهر بش ..

— أنا مش بهرب .. بس عندى شك إنك ممكن تفهمينى

.. قالها ووقف ليسند يداه على سور البلكونه .. فوقفت

هى بجانبه : ليه هو إنت شايفنى غيبه ! ..

— تعرفى يا ساره .. مره أمى وهى بتعلمنى شطرنج

قالته جملته .. قالت " متلعيش أى حركه غير لما تكون

هتستفاد من وراها " ...

نظرت له بدهشه : فريد برده قالى كده .. وقالى

" لازم تتواصلى بعفالك مع قطع الشطرنج

يا ساره .. ساعتها القطع هتقولك خطط الخصم بتاعك

وهتساعدك تغالبه " ...

— عنده حق .. قالها شريداً وكأنه أصبح يبتشي

بالمحادثه .. صمت بُرّه ثم أردف : بس أمى نسيت
حاجه مهمه اوى يا ساره ..
— نسيت ايه ؟؟

نظر لها بأعين ملاًها الحزن : نسيت إن الشطرنج
ميعرفش لغه التضحيه .. التضحيه الحقيقيه ..
الشطرنج بيعلمك تضحى بحاجه فى سبيل حاجه أكبر ..
لكن عمره ما بيعلمك تضحى بدون مقابل.

* * *

— مبتزديش على الموب ليه يا ساره
وقفت أمامه مشدوهة لم تتوقع ملاحقته لها لهذا الحد ...
أخذت شهيقاً .. وكان زفيرها تلك الكلمات
— أنت عاوز منى ايه يا مهاب ، اللي بينا خلاص
بيخلص .. ان مكانش خلص .. انت عاوزنى ارد عليك
بعد الكلام اللي انت قولته
— ايه الكلام اللي انا قولته مخليكي زعلانه اوى كده ؟
— يسلام ... بقا مش عارف ... طب كئش يا مهاب ..
كئش من وشى ... اوووف
تخطته مغادرة عندما ركض نحوها وأمسك ذراعها
الذى كان يحتضن كتاباً ...

— إستنى بس ... كل ده علشان قولتلك بلاش تمشى مع
رحاب ... طب انا اسف .. امشى مع اى حد يعجبك
نظرت له بنديه : لا مش كده وبس انت ناسى قولت ايه
عليها .. وكمان كل شويه تقولى البسى ده وملتبسيش ده
.. اعرفى فولان ومتعرفيش فولان
روحى ومتروحيش .. كلى ومتاكلش .. انت ناقص
تقولى أدخل الحمام امتى ..
— حبيبتى انتى أوفر اوى النهارده .. وانا بقولك كده
علشان بغير عليكى حقيقى .. وبحبك ..
— علشان بتحبنى تخنقنى يا مهاب .. ده انا خسرت نص
اصحابى يا اخى
— طب خلاص متزعلش تعالى فى حضنى
قالها فاتحاً ذراعيه لضمها بينما نظرت له وأطرقت :
مهالاب ... كش يا مهاب

* * *

اتجهت بجانبه بعدما كان يجلس وحيدا يمسك كتاباً علمياً
ولكن نظراته كانت خارج الكتاب .. شارداً كان ..
فجلست
— مالك ؟

انتبه لها للتو .. ففتحتم ثم ابتسم
 — مفيش ... خلصتى محضراتك ؟
 — أيوه .. بس متهربش من الموضوع .. كنت بتفكر فى
 ايه ؟

— كنت بفكر فيكى طبعاً
 — مش بهزر يا مهاب شكلك مدايق وسرحان كده
 نظر لها مباشرة وإختفت ابتسامه رسمها على ثغره
 بحرفيه .. ملأ الأسى عيناه كالعاده ثم قال :
 — أمى وحشتنى أوى يا ساره .. وحشتنى أوى ..
 ساعات بقعد افكر .. ليه كده ؟ .. كسبوا ايه لما عاندوا فى
 بعض .. لما كل واحد فيهم كان عاوز يكون هو اللى
 مسيطر على البيت .. كسبوا ايه
 بيتهيقلى محدش فيهم خسر حاجه .. واحد مات وواحد
 سافرت واتجوزت .. وانا الوحيد اللى خسرت ...
 تعرفى لولا عمى كان زمانى مرمى فى الشارع ..
 ساعات بقول طب بابا بعد عنى غصب عنه .. الموت هو
 اللى اختار كده ..
 لكن امى بعدت عنى ليه ؟؟ ..

* * *

تذكرته مجددا .. لا مفر من الذكريات ..
 كم كانت سنواتها معه مليئة بالبهجة .. وكم باتت
 السنوات رتيبه يملأها الملل الى العنق ..
 يملأها الألم .. لم تجد من يضاهيه فى حنانه او فى حبه
 لها .. وربما بعدما قارب عمرها على الثلاثون .. أيقنت
 انها لن تجده او حتى تجد مثيلا له ايدا .. وبعد رفض
 دام طويلاً لسلسه من العرسان ... بات القبول بزواج
 أمرا مقبولا بعدما لامست عقدها الثالث .. مجرد زوج
 .. لتستمر الحياه ...

* * *

أمسكت الهاتف وضغطت رقمه .. فجاءه صوته نائماً
 لكن ذلك لم يمنعها من البوح بقرارها الاخير :
 — مهاب .. نايم ؟ ...فوق كده عاوزه اتكلم معاك
 — خير يا حبيبتي
 — مهاب مش هناجل معاد الفرح شويه
 جاءها صوته مشدوهاً : ليه ؟
 — مفيش .. قلقلانه و عاوزه افكر ..
 — تفكرى فى ايه
 — مش عارفه يا مهاب .. مش عارفه يا أخى

صمت قليلاً لإستيعاب اللهجة الجديده ثم اجاب مستهزئاً
: يا أخى !!

— إنت بتتريق عليا يا مهاب !

— مالك بتتكلمى بالاسلوب الغريب ده معايا ليه ..

اتكلمى بأسلوب أحسن من كده

— هو ده أسلوبى لو مش عاجباك خلاص

— منا عارف ... عارف يا ساره انه خلاص ... من

فتره وانا حاسس بالتغيير اللى حصلك .. وبكذب نفسى

.. والنهارده من أول ما سمعت صوتك وأنا عارف انه

خلاص ..

— مهاب ..

قاطعها : ليه يا ساره ايه اللى حصل ؟

— مهاب .. أنا خايفة .. إحنا من يوم ما عرفنا بعض

واحنا بنلعب شطرنج يا مهاب ...

بس بنلعب ببعض .. كل واحد عاوز يسيطر فينا على

التانى وعلى الحياه ودايما مشاكل ... مهاب انت متعقد

من الحته دى ... ودايما عندك هاجس انى عاوزه

اسيطر عليك فبتعمل حجات بتدايقنى هدفها ان تلغى

الهاجس ده من عندك وانا مش هستحمل

وشكل علاقتنا كده رايح على منحدر مجهول .. خايفة
نخوض التجربه ويكون مصيرها نخلف ابن ويحصله
نفس اللي حصلك وانت صغير .. علشان كده او كده
هنسيب بعض

أنهت كلماتها وصمتت ... ولم تتلقى رد .. حتى أردفت
: ساكت ليه يا مهاب ...

أجابها بصوت باكى : انتى بس اللى كنتى بتلعبى
شطرنج يا ساره .. انما انا حبيتك حقيقى ... انتى مش
بتبصى غير تحت رجلك .. ودايما بتخلطى بين
المصطلحات ... خوفى عليكى بتعتبريه تحكم .. غيرتى
بتعتبريها شك .. محاوله انى احافظ عليكى وانصحك
بتعتبريه سيطره .. طول الوقت انتى اللى واهمه نفسك
انى بسعى للسيطره فبتصدى ده بمحاوله سيطرتك انتى
وفى الاخر انا اللى تلعتت معقد ومريض نفسى مش
كده ... وخايفة تخلفى عيل شبهى يطلع متعقد علشان
امه سابته وابوه انفصل عن امه ... صح
— مهاب

— خلاص يا ساره ... انتى مش مجبره عليا كزوج ..
ولا أنا مجبر عليكى كحبيبته

* * *

الأُنثى بعدما تتخطى الثلاثين ولا تملك من صنف
الرجال سوى ذكريات بائسه .. هى فى الحقيقة أنثى بور
ضمرت مشاعرها .. وباتت حبيسه الذكرى فقط ..
لزالتمسك اخر رساله أرسلها لها قبل أن يختفى
والتي باتت تحفظها عن ظهر قلب وأحياناً تقرأها
بصوت مرتفع

" ساره ... عمرى ما لعبت بيكى شطرنج .. دايماً كنت
بحاول ابعده قواعد الشطرنج عن دماغى .. مش بدور
من كسبان ومين خسران ... مش بدور هكسب ايه فى
اللعبه اللى جايه .. مش بدور مين فينا هيغلب التانى
لأنى كنت شايف اننا واحد .. انتى دايماً كنتى شايفه
العكس .. دايماً كنتى عاوزة تطلعى الكسبانه .. دايماً
بتخططى ايه الحركه الجايه ... انتى اللى مكنتيش عارفه
تطلعى عقدك من جواكى وتصارحى بيها نفسك يرغم
انى شاورتلك عليها كزا مره وكنتى بتتهمينى انى مش
قادر افهمك او عاوز اسيطر على دماغك ومقاومتك ..
دايماً كان فى نديه .. دايماً كان فى معركة ...
والحب مش كده ...

الحب مش كده يا ساره ...
الحب مفيهوش مكسب وخساره ..
الحب الحقيقى هو اللى الطرفين اما بيكسبوا فيه
او بيخسروا فيه .. لكن ان واحد يكسب وواحد يخسر ده
مش حب ... اللى كسب المعركه عمره ما حب بجد
واللى خسر عمره ما اكتشف الخدعة ... مبروك عليكى
المكسب يا ساره ... ومبروك عليا الكش "

يشرفنى تقبل الأراء والنقد البناء ..
حساب الفيس بوك :

[eng.mohamed.degham@facebook.com](https://www.facebook.com/eng.mohamed.degham)

حساب الجيميل :

mohameddegham10@gmail.com

برمو الكتاب على اليوتيوب :

<https://youtu.be/qL0xyM56zlg>

